



pngelectionprinting.com



POSTERS BANNERS CARDS A-FRAMES FLYERS CAR STICKERS CORFLUTE SIGNS

Pangu Pati bai sanapim ol nupela man tasol

James G. Kila i raitim

PALAMENTERI lida bilong Pangu Pati, memba bilong Bulolo na deputi oposisen lida, Sam Basil, i tok Pangu Pati bai sanapim ol yangpela na nupela kendideit long resis long 2017 Nesenel Ileksen.

Mista Basil wantaim tim bilong em i kamapim bikpela kibung long Madang taun long las wik Sarere, Epril 1, long tokaut long pati polisi bilong ol.

Mista Basil i tok, Pati i no

laik long endosim ol olupela politisen bikos pati i no laikim ol olupela lain politisen long go bek gen na sik bilong pasin korapsen bai stap yet.

Mista Basil i bin mekim ol gutpela toktok long ai bilong ol lida husat i go pas pastaim long kirapim Pangu Pati olsem pastaim praim minista na nau Gavana bilong Is Sepik, Gren Sif Sir Michael Somare, long Bates graun long Madang taun.

Mista Basil i tokaut tu olsem Pangu Pati bai kamap namba wan politikal pati we

bai lukim ol kendideit bilong en husat i winim na redi long go long palamen bai sainim wangepela memorandum ov andastending (MoU) we bai lukim ol memba i stap 70 pesen long distrik bilong ol na no ken westim taim long Mosbi.

Mista Basil i tokaut tu olsem dispela nupela tim bilong Pangu Pati bai strongim polisi we bai givim moa luksave long egrikalsa sekta na tu strongim ol lokal level gavman na wod wantaim gutpela helpim na

sapot long sevises i mas go daun moa long ol gras ruts pipel long viles, hauslain na rurel komyuniti long kantri.

Mista Basil i tokim ol manmeri long Madang olsem taim bilong kempen na ileksen i kam klostu nau, tasol ol pipel i mas skelim gut na askim na salensim husat pati long tokaut long pablik long polisi bilong en pastaim.

Mista Basil i bin go wantaim deputi palamentari lida bilong Pangu Pati na MP bilong Goilala, William Samb, na politikal edvaisa

bilong pati, Dulciana Somare Brash.

Pastaim lida bilong Pangu Pati na papa bilong kantri, Gren Sif Sir Michael Somare tu i bin givim toktok na i strongim ol yangpela lida long sanap strong long bungim kantri na kamapim divelopmen bilong gutpela bilong ol pipel long olgeta rijon bilong PNG.

Dispela raun bilong Gren Sif, Sir Michael Somare em las taim bilong em olsem politisen i go long Madang provins.

INSAIT

The Catholic Reporter

bilong mun Epril i stap insait - P 9, 10, 19 na 20



Palamen Nius - P2



Winim moa lo Easter



TV, tablets na smart phone

Lukim moa lo page 7



Lephan i go long raithan: Memba bilong Sohe na Minista bilong Komyuniti Divelopmen, Yu na Sios, Delilah Gore, Gren Sif Sir Michael Somare, Gavana bilong Isten Hailans, Julie Soso na Misis Ledi Veronica Somare i amamas wantaim long taim bilong ol Memba bilong Palamen na ol pablik sevan i tok tenkyu na gutbai long Gren Sif long Tunde.

Ol tupela bikmeri memba bilong Palamen i amamas long papa bilong kantri long dispela piksa.

Lukim moa piksa long pes 16

Skel Rice MEDIUM GRAIN

Also available in **200g**

goodman fielder

PVM26615b



SMILES AT MEAL TIME

Palamen kibung kamap gut

PALAMEN NIUS
wantaim Paul Zuvani



Zurenouc askim long strongim daun strim prosesing wok

Paul Zuvani i raitim

NESENEL Palamen Spika na Memba bilong Finshafen Theodore Zurenouc i tok Gavman i mas pasim wok bilong salim ol netsurel risoses bilong kantri i go aut.

Em i tok kantri i wok long toktok long hevi bilong mani i sot tasol long narapela sait i askim kampani bilong ol narapela kantri i kam kisim ol risos bilong em i go aut.

Em i mekim dispela tok long strongim wok bilong smol i go long midim bisnis long lidas Samit o kibung long Mosbi las wik

Zurenouc i tok long larim kampani i kam insait long katim diwai bilong kantri inap mipela i pasim ol kampani na stat salim raun loging i go aut.

Em i tok wok bilong katim diwai i no hat, ol manmeri inap long mekim. Ol tumbuna bilong mipela i katim diwai long taim na ol i gat save bilong katim diwai.

Em i tok ol gavman ejensi i ken soim tasol ol manmeri long katim.

"Mipela i mas tokim ol bikipela kampani long pinis long katim diwai bilong mipela," Zurenouc i tok.

"Ol kampani i kam long nem bilong developmen tasol i wok long bagarapim busgraun bilong mipela taim ol i katim diwai. Ol i kisim bikipela mani na givim mipela liklik mani tasol. Pasim dispela ol kampani."

Em i askim Gavman na ol manmeri long smat liklik. Em i tok ol manmeri i mas stat yusim save God i givim long ol long mekim wok.

Em i tok em i no hatpela samting long katim diwai. Olgeta man i save long katim diwai.

Long katim diwai, wanpela i no mas go long yunivesiti long kisim save.

Gavman helpim mipela tasol long rot bilong katim diwai, prosesim na salim diwai bilong mipela i go aut.

Dispela i wankain long Fiseris sekta. Mi ting em inap.

Pasim olgeta pis kenari na larim mipela yet i pulim pis bilong mipela, salim long gavman kenari na salim can pis i go aut na kisim mani.

"Mi les pinis long harim ol toktok bilong kisim investa i kam insait," Zurenouc i tok.

"Mi laik save long olgeta dispela keneri, long mipela i kisim hap win mani o profit long dispela, mipela i gat wanem kain ekuiti. Long dispela ol developmen, mipela i mas kisim 50 pesen long dispela.

"Sapos bikipela i laikim, mipela bai kam bek na pasim dispela ol rot we mani i save go aut."

I BIN gat ol tok olsem Nesanel Alaiens (NA) pati bai no inap stap insait long Palamen kibung long dispela wik.

Tasol bung bilong Tunde i lukim ol i kamap.

Ol toktok bilong NA i no laik kamap long bung em bikos ol i no amamas long harim ol tok long Palamen i bin pasim plen bilong em long tok gutbai long Sir Michael long pinis wok bilong em long wok politik.

Sapos dispela i tru o nogat, Palamen i redim ol tok na tok gutbai long Sir Michael.

Sampela toktok tu i kamap long Palamen i bin plenim wanpela bikipela tok gutbai long kamap ausait long Palamen olsem ami na polis bai mas na Sir Michael i mas kisim 21-gan salut tasol dispela i no kamap na ol Memba i mekim tok gutbai insait tasol long Palamen.

Dispela wik i las Palamen kibung bilong Sir Michael.

Sir Michael i wok politik long 49 krismas we em i stat long 1968 long Haus ov Asembli aninit long lukaut bilong Australia i kam inap long em i go pas long kantri long kisim Independens long 16 Septemba, 1975 na dispela wik em i tok aut long pinis long wok politik.

Palamen tok gutbai long Sir Michael

PALAMEN long dispela wik i pasim olgeta narapela agenda o toktok em i makim long mekim i go long tok gutbai long Gren Sif Sir Michael Somare.

Lida bilong Gavman Bisnis James Marape i tokaut long Sir Michael bihain long em i winim ileksen long kamap lida bilong Is Sepik i go insait long Haus ov Asembli long 1968.

Dispela i makim 49 Krismas olgeta long em i wok politik.

Long tok gutbai long em Praisim Minista Peter O'Neill i makim Gavman, Oposisen lida Don Polye i makim Oposisen na Spika i makim Palamen.

Tasol pastaim long dispela ol Memba bilong Is Sepik, Wes Sepik na Madang olsem John Simon (Maprik), Salio Waipo (Angoram), Jim Simatap (Wewak) Joe Sungi (Nuku), Akmat Mai (Wes Sepik), Jim Kas (Madang) na John Hickey (Bogia) i kisim Sir Michael i go insait long Palamen,

Spika i askim olgeta Memba wantaim olgeta arapela manmeri husat i stap long Semba long sanap na soim rispek long Sir Michael taim em i go insait.

Olgeta Memba na manmeri i paitim han taim Sir Michael i wokabout i go insait.

Bihain long dispela Spika i askim Sir Michael long sanap na givim lastaim toktok bilong em i go long Palamen.

Sir Michael i bin stap long tupela

Haus ov Asembli (1968, 1972) na 9-pela taim long Palamen stat long 1977. Long taim em i wok politik Sir Michael i no lusim wanpela ileksen inap long taim em i pinis long wok politik long dispela wik.



Gren Sif Sir Michael Somare

Singaut i go long Stet ejensi long wok hat

OLGETA sekta i mas wok strong long mekim mani, Fainens Minista na Memba bilong Tari Pori i James Marape i tok.

Em i tok ol sekta olsem trenspot we Air Niugini i stap long em, forestri, piseris, eneji (PNG Pawa), egrikalsa, turisim, Eda Raun, PNG Wara na Nesanel Hausing Koporesen i mas wok hat long mekim mani.

Em i tok olgeta taim ol Dipatmen na ejensi i tok ekspenditsa (yusim mani) tasol no gat wanpela bilong ol i tok long kamapim mani.

Em i tok dispela toktok bilong yusim mani i mas pinis na ol i mas toktok moa long mekim mani.

Em i mekim dispela tok long taim bilong kibung bilong ol Memba na hetman bilong ol dipatmen long Mosbi las wik.

Em i tok long 2012 taim ol i kisim gavman na i plenim mani bilong yia, mak bilong mani ol i gat long dispela taim i liklik long mak bilong mani ol i gat long yusim.

"Long ol toktok bilong mipela, mi lukim 95 pesen ol toktok bilong mipela i stap long ekspenditsa," Marape i tok.

"I no gat wanpela sekta i toktok long revenu. Revenu o wok bilong mekim mani i lukim mipela i gat mani.

"Taim mipela i mekim mani, wanpela i ken stat long toktok long yusim mani."

Marape long baset bilong infrastraksa ol toktok long infrastraksa bilong missing link olsem rot long Telefomin (Wes Sepik) i go long Kiunga (Westen), Madang i go long Sepik, Baiyer (Westen Hailans) i go long Madang, Erave (Sauten Hailans) i go long Kikori (Galp), Wau (Morobe) i go long Kerema (Galp) na Wes Nu Briten i go long Is Nu Briten.

Em i tok dispela em ol nupela rot na bikipela baset i no save kisim dispela ol rot wantaim.

Skelim baset i go, bikipela hap i go bilong baim ol pablik sevis. Bilong wanem na mipela i mas yusim bikipela mani olsem.

Inap long mipela pinis long toktok bilong ekspenditsa na stat toktok long revenue jenereting wok?" Marape i askim.

"Ol liklik samting olsem taim menesmen i bikipela samting. Em taim bilong mipela i askim ol politikel lida na dipatmen het.

"Yu ken lusim narapela ol samting tasol taim yu lusim taim yu no inap long kisim bek."

"Mipela olsem lidaman long wok bilong mipela i mas save long menesim taim.

"Taim yu no menesim taim, yu lusim mani," e m i tok.

Naru: Kamapim ekuitebel distribusen, rausim ikual distribusen sistem

GAVMAN i mas senisim sistem we em i skelim mani na risoses bilong kantri. Gavana bilong Morobe Kelly Naru i tok.

Em i tok wan wan ol distrik na provins i gat nid bilong em na gavman i mas lukssave long dispela bipo long em i kamapim baset.

Em i tok ol distrik olsem Menyamia long Morobe, Karamui Nomane (Chimbu) na Telefomin long Sandaun provins i narapela long nid bilong ol ilektorek long Mosbi o Lae.

Naru i mekim dispela tok long taim ol Memba bilong Palamen na hetman bilong ol Gavman Dipatmen na oganaesen i bung long Mosbi las wik long tokaut long wok ol i

kamapim.

"Mipela i mas skelim gen wok bilong tilim mani we ol i tok ikwal distribusen i go long ekuiti distribusen," em i tok.

"Mipela i mas tilim mani long hamas manmeri i stap long wanpela distrik na we dispela distrik i stap."

Naru i tok kos bilong kisim ol kago na sevis long taun i go long ol distrik i stap longwe na i dia moa long ol distrik i stap long siti o taun.

Em i tok taim ol i yusim mani long baim rot, ol i no gat mani long kamapim ol projek we ol i plen long kamapim.

"Mi lukim serim mani na lukim wan wan distrik i kisim mani long wankain mak i no

ikwal long taim wanpela distrik i gat moa manmeri na i stap longwe long ol siti na taun."

Long dispela em i tok dispela em i inikwaliti.

Naru i tok arere long provinse sevis impruvmen program (PSIP) na distrik sevises impruvmen program (DSIP) mani dispela i wankain long ol arapela fanding olsem tuisen fi fri (TFF) na fri helt kea polisi mani.

Wantaim dispela Gavana i askim long kamapim wok resis namel long ol Gavman bisnis.

Em i tok Gavman i mas kamap wok resis wantaim ol gavman bisnis olsem PNG Pawa, Air Niugini na PNG Wara.

Em i tok sas bilong yusim sevis bilong dispela ol ejensi i

antap moa tasol sevis ol i givim i no gutpela.

"Sas bilong wanpela i ron long Air Niugini insait long kantri i dia tumas long balus bilong wanpela Esia kantri na ron namel long Esia," em i tok.

"Mi laik dispela pasin bilong wanpela kampani i mas pinis na gavman i kamap wok resis we i ken lukim moa turis i kam insait."

Em i tok dispela i wankain long sas bilong ol sip na PNG Wara.

"Mipela i mas strongim tingting bilong kompetisen o wok resis namel long dispela ol kampani," Naru i tok.

"Taim i gat resis ol bai kamapim gutpela sevis."

Biknem Jenelis kam bek long PNG

SEAN Dorney, wanpela biknem jenelis bilong ABC husat i save stap long kantri bipo na wokim nius bilong planti bikpela divelopmen bilong kantri bai stap long kantri long wik bihain taim NBC Nesenel Pres Klap i holim namba tri pres konprens long Lamana Hotel gen.

Mista Dorney bai kam long PNG long stap long jenelis wok tebol long askim kwesten long Gren Sif Sir Michael Somare husat bai stap olsem spesel ges long taim bilong NBC Nesenel Pres Klap miting.

Miting em i op long olgeta lain husat inap long baim K150 tiket long Lamana Hotel.

Insait long wanpela nius rilis i kam long NBC, ripot i tok olsem Sean i bin kam long PNG namba wan taim long 1974 we em i bin

helpim long kamapim tingting bilong kantri kisim independens Sean I bin wokim ol gutpela stori na nius bilong em we I no wansait tasol em I save putim gut stori long karamapim olgeta sait bilong stori.

Menesing Dairekta bilong Nesenel Brotkasting (NBC) Kora Nou i tok, "Olsem wanpela foren koresponden Sean i save painim aut gut as bilong ol kain kain gavman na ol wok na pasin bilong ol, wanpela bilong ol em Gren Sif Sir Michael yet."

"Dispela NBC Nesenel Pres Klap i givim Sean na ol narapela bik nem jenelis sans long askim ol strongpela kwesten wanpela moa taim," Mista Nou i tok.

Siaman bilong Midia Kaunsil bilong PNG, Alex Rheeney i tok em i amamas long dispela.

Midia Kaunsil bilong

Papua Niugini i tok welkam long biknem ABC ripota Sean Dorney long stap long NBC Nesenel Pres Klap miting. Midia Kaunsil PNG i go pas long redim ol nius ripota long stap insait long NBC Nesenel Pres Klap.

Sean i bin stap long PNG wanpela yia pastaim long kantri kisim independens na em i bin wokim ol ripot long olgeta samting i bin kamap we nau i stap insait long ol histori buk bilong PNG na Australia. Em i bin stap pas wantiam ol papa bilong dispela kantri olsem Sir Michael. Stap bilong em insait long Nesenel Pres Klap bai givim sampela gutpela tingting i go bek long taim independens bilong PNG.

Lowy Institute long Australia i helpim Sean Dorney long wokabaut bilong em i kam long PNG long dispela taim.

Gren Sif Sir Michael Somare bai toktok long Pres Klap

GREN SIF Sir Michael Somare bai toktok long NBC Nesenel Pres Klap long Mande 10 Epril. Sir Michael Somare husat i provinsal memba bilong Is Sepik i bin ritaia long politiks long dispela wik Tunde.

Em i bin memba bilong Is Sepik rijonal inap 49 yia olgeta.

Long dispela spesel bung bilong pres klap bai i no gat planti jenelis i stap. Bai i gat sampela senia jenelis husat bai askim ol kwesten.

Sir Michael i bin kamap memba bilong Haus ov Asembli long 1968 na em i go pas long toktok long PNG i mas kisim selp gavman na independens long taim em i lida bilong Pangu Pati.

Em i bin kamap namba wan praim minista bilong kantri long taim PNG i kisim independens long Australia long 16 Septemba 1975.

Insait long 41 yia bilong independens, Sir Michael i bin go pas long kamapim planti ol bikpela samting long PNG na wantaim ol arapela kantri long wol.

Sir Michael i bin holim wok bilong Praim Minista



Tenkyu Gren Sif Sir Michael Thomas Somare, Memba bilong Pot Mosbi Saut na Minista bilong Spots na APEC, Justin Tkatchenko i tok amamas long Gren Sif Sir Michael na Gren Sif Somare i apim han long luksave na Spika, Theo Zurenuoc i wanbel na i paitim han. Ol i bin stap long Stet Fangsen Rum bihain long Nesenel Palamen i bin tok gutbai long Gren Sif Sir Michael long Tunde dispela wik. Foto: Nicky Bernard.

foapela taim long laip bilong em olsem politisen.

NBC nesenel redio na televisen bai i brokas dispela bung bilong ol jenelis wantaim Sir Michael.

NBC Nesenel Pres Klap em i wanpela wei bilong ol patna i opim rot bilong strongim demokretik midia

na givim infomesen i go aut long ol pablik.

Manesing dairekta bilong NBC, Kora Nou wantaim presiden bilong Media Kaunsil bilong PNG, Alexander Rheeney i tok tenkyu long Sir Michael long tok orait long kamap long dispela bung bilong Pres Klap.

Gavana Jeneral kisim tok bilong redi long ileksen

GAVANA Jeneral Bob Dadae i amamas long Papua Niugini Ilektoel Komisen long wok redi bilong em long kamapim Julai Nesenel Ilek-sen.

Sif Ilektoral Komisina Patilias Gamato i tokim Dadae long dispela wik long wok em i mekim long lukim ileksen i kamap gut.

Gamato i tokim Gavana Jeneral olsem wok bilong printim ol writ nau i wok long kamap na bai redi bipo long 20 Epril bipo long em (Dadae) i sain na givim aut ol writ. I gat olsem 666 writ long Gavana Jeneral i printim.

Komisina i tok ol balot pepa bai kamap long kantri long narapela wik. Em i tok long wok bilong lukim abrusim ol paul pasin i kamap long ol pepa. Dispela ol pepa i gat 15 sekyuriti mak na bai gat narapela narapela kala long soim pepa bilong provinsel sia i

narapela long open ilektoet. Wankain mak bai kamap long ol balot boks.

Lokal kampani Barlow Indastris Ltd bai kamap 70 000 balot boks na dispela em bai givim long Komisen long namba tu wik bilong Epril.

Gamato i tok apdet bilong Komon Rol i wok long kamap gut na bai pinis long narapela wik. Em i tok rintim bilong las Komon Rol bai kamap long pinis bilong Epril o stat bilong Me na dispela bai go long olgeta provins.

Komisina i tokim Dadae olsem namel long Australia, Nu Silan na Amerika namba bilong ol ileksen obseva bilong ileksen long arapela kantri i go bikpela wantaim 10-pela kantri.

Sif Ilektoel Komisina bai bung wantaim Australia Difens Fos long narapela wik long toktok bilong lojistik, moa long sait bilong trenspot long kisim ol balot pepa i go long ol longwe

ples. Wantaim dispela Gavman bilong Saina i givim inap olsem 130 nupela Toyota Hilux long Komisen long helpim ranim ileksen.

Gamato i tokim Gavana Jeneral olsem em bai putim bikpela was long ol ilektoral opisa long ol i mas bihainim lo bilong ranim ileksen na wanpela vota i no ken makim laik bilong planti lain long vot.

Em i tok inap olsem 2000 kendidit i soim laik long sanap long dispela yia Jeneral Ilek-sen.

Dadae i tok em i amamas long wok redi bilong Komisen na kamap bilong ileksen.

"Taim yu redi yu bai mekim gut long abrusim ol hevi bai i kamap. Yu mekim gut we i lukim planti manmeri i enrol long vot," Dadae i tok.

"Mi lukluk tasol long kamap bilong gutpela ileksen."

Gamato i salim tok lukaut long ol ileksen opisa

ILEKTORAL Komisina, Patilias Gamato, i salim tok lukaut long ol opisa bilong ileksen long bihainim ol lo bilong ileksen.

Gamato i no laikim ol narapela lain i ken makim maus bilong ol arapela i no stap long taim bilong tromoi vot, na makim balot pepa bilong ol, nogat.

Em i tok olsem ol bai toktok strong egensim ol opisa husat i no bihainim ol lo bilong ileksen.

"Australia Gavman bai helpim mipela long karim ol kago bilong ileksen i go kam," Gamato i tok.

Em i tokaut tu olsem Gavman bilong Saina i helpim



Ilektoral Komisina, Patilias Gamato. Ilektoel Komisen wantaim 130 kar bilong ranim nesenel ileksen.

Gamato i tok moa olsem sampela bilong ol Ritening Opisa (RO) na Asisten Ritening Opisa (ARO) bai resis long dispela nesenel ileksen na long dispela astingting, ol bai mekim liklik senis long ol RO na ARO. Gamato i bin tokaut long dispela long bung bilong Nesenel Alaiens Pati. "Nem bilong ol RO na ARO em ol bai raitim antap long ol Rits oda pepa na Gavana Jenerel, Bob Dadae, bai sainim."



Need help to avoid impulsive spending? Protect and grow your money with a **TERM DEPOSIT.**

We are the Bank for Savings

WE ARE BSP





Gren Sif Sir Michael Somare bai toktok long Pres Klap

GREN SIF Sir Michael Somare bai toktok long NBC Nesanel Pres Klap long Mande 10 Epril.

Sir Michael Somare husat i provinsal memba bilong Is Sepik i bin ritaia long politik long dispela wik Tunde.

Em i bin memba bilong Is Sepik regional inap 49 yia olgeta.

Long dispela spesel bung bilong pres klap bai i no gat planti jenalis i stap. Bai i gat sampela senia jenelis husat bai askim ol kwesten.

Sir Michael i bin kamap memba bilong Haus ov Asembli long 1968 na em i go pas long toktok long PNG i mas kisim selp gavman na independens long taim em i lida bilong Pangu Pati.

Em i bin kamap namba wan praim minista bilong kantri long taim PNG i kisim independens long Australia long 16 Septemba 1975.

Insait long 41 yia bilong independens, Sir Michael i bin go pas long kamapim planti ol bikpela samting long PNG na wantaim ol arapela kantri long wol.

Sir Michael i bin holim wok bilong Praim Minista foapela taim long laip bilong em olsem politisen.

NBC nesanel radio na televisen bai i brokas dispela bung bilong ol jenalis wantaim Sir Michael.

NBC Nesanel Pres Klap em i wanpela wei bilong ol patna i opim rot bilong strongim demokretik midia na givim infomesen i go aut long ol pablik.

Manesing dairekta bilong NBC, Kora Nou wantaim presiden bilong Media Kaunsil bilong PNG, Alexander Rheeney i tok tenkyu long Sir Michael long tok orait long kamap long dispela bung bilong Pres Klap.

Pangu Pati endosim Singirok na Krammer long Madang ileksen

JAMES G. KILA i raitim

PALAMENTERI lida bilong olupela politikal pati long kantri Pangu Pati, Sam Basil i tokaut olsem pati i endosim o givim tok-orait long sanapim ritaia ami meja jeneral, Jerry Sin-

girok long resis long Madang rijinol sit long 2017 Nesanel Ilekse.

Mista Basil i bin tokaut long dispela long Madang taim em wantaim bilong em i statim aweanes raun bilong tokaut long Pangu Pati polisi long ol distrik

long Madang provins.

Ol i statim long Madang na bihain bai go olsem long Bogia, Sumkar, Midel-Ramu, Usino-Bundi na Raikos distrik.

Mista i tokaut tu fran long planti handret pipel long Madang olsem Pangu Pati i endosim o tok-orait long sanapim bisnisan Brian Krammer long sanap resis long Madang Open sit.

Insait long dispela bikpela Pangu Pati polisi aweanes lausing long Madang, Mista Basil i tokaut tu olsem pati i endosim Dulcianna Somare Brash long sanap resis long Is Sepik Rijinol long 2017 Nesanel Ilekse.

Dulcianna Somare Brash em politikol

analisis o edvaisa bilong Pangu Pati. Em wantaim papa bilong em Gren Sif Sir Michael Somare i bin go wantaim Pangu Pati tim long Madang long las wik Sarere long launsim pati polisi fran fran long planti handret pipel.

Mista Basil i tokaut olsem em i amamas long tokaut olsem wanpela Somare bai sanap bihainim lek-mak bilong papa long sanap long Is Sepik Rijinol sia long 2017 Nesanel Ilekse.

Pangu Pati lida i tokaut long Madang tu olsem Pangu Pati bai kamap olsem namba wan politikal pati we bai lukim ol kendideit bilong en husat i winim na redi long go long palamen bai sainim wan-

pela memorandum ov andastending (MoU) we bai lukim ol memba ya i stap 70 pesen long distrik bilong ol na noken westim taim long Mosbi siti.

Mista Basil i tokaut tu olsem dispela nupela tim bilong Pangu Pati bai strongim polisi we bai givim moa luksave long agrikalsa sekta na tu strongim ol lokal level gavman na wod wantaim gutpela helpim na sapot long sevises i mas go daun moa long ol gras ruts pipel long viles, hauslain na rurel komuniti long kantri.

Mista Basil i tokaut long ol pipel bilong Madang olsem ol mas tingting gut na makim ol lida wantaim ol politikol pati husat i gat gutpela polisi bilong en.

Gavana Jeneral long sainim ileksen writ

GAVANA Jeneral Bob Dadae i amamas long Papua Niugini Ilektorel Komisen long wok redi bilong em long kamapim Julai Nesanel Ilekse.

Sif Ilektoral Komisina Patilias Gamato i tokim Dadae long dispela wik long wok em i mekim long lukim ileksen i kamap gut.

Gamato i tokim Gavana Jeneral olsem wok bilong printim ol rit nau i wok long kamap na bai redi bipo long 20 Epril long em (Dadae) i sainim na givim aut ol rit. I gat olsem 666 rit long Gavana Jeneral i sainim.

Komisina i tok ol balot pepa bai kamap long kantri long narapela wik. Em i tok long wok bilong abrusim ol paul pasin i kamap long ol pepa, dispela ol pepa i gat 15 sekyuriti mak na bai gat narapela narapela kala long soim pepa bilong provinsal sia i narapela long open ilektoret. Wankain mak bai kamap long ol balot bokis.

Lokal kampani Barlow Indastris Ltd bai wokim 70 000 balot bokis na givim long Ilekotoral Komisen long namba tu wik bilong Epril.

Gamato i tok apdet bilong Komon Rol i wok long kamap gut na bai pinis long narapela wik. Em i tok printim bilong las Komon Rol bai kamap long pinis bilong Epril o stat bilong Me na dispela bai go long olgeta provins.

Komisina i tokim Dadae olsem namel long Australia, Nu Silan na Amerika namba bilong ol ileksen obseva bilong ileksen long arapela kantri i go bikpela wantaim 10-pela kantri.

Sif Ilektorel Komisina bai bung wantaim Australia Difens Fos long narapela wik long toktok bilong lojistik, moa long sait bilong transpot long kisim ol balot pepa i go long ol longwe ples. Wantaim dispela Gavman bilong Saina i givim 130 nupela Toyota Hilux long Komisen long helpim ranim ileksen.

Gamato i tokim Gavana Jeneral olsem em bai putim bikpela was long ol ilektoral opisa long ol i mas bihainim lo bilong ranim ileksen na wanpela vota i no ken makim laik bilong planti lain long vot.

Taim bilong vot bai kamap orait long Hailans

TAIM bilong vot long Westen Hailans, Jiwaka na Simbu Provins bai kamap orait

Asisten Komisina Polis Isten Koman, Nema Mondiai, bai lukautim sekyuriti opresen long Westen Hailans, Jiwaka na Simbu provins i tok olsem Nesanel Ilek-

sen bai kamap gut long ol dispela tripela provins bihain long ol i mekim awenes bilong Ilekse.

Ol polis mobail skwat 5, 6, na 7 i save stap long Mt Hagen wantaim MS8 bilong Kerowagi na ol bai redi gut sekyuriti wok long ol dispela tripela provins.

Ol PNG Difens Fossoldia, Koreksenal na polis taskfos bai sapotim ol.

Ol tripela mobail skwat grup long Wabag, Laiagam na Mendi bai lukautim Sauten Hailans, Hela na Enga provins.

"Mipela i gat inap sekyuriti long lukautim dispela ileksen.

Na mipela bai singautim moa menpawa bihain sapos i gat sampela trabel i laik kamap," Mondiai i tok.

Em i tok olsem ol pipel bai stat vot long Simbu, bai go long Jiwaka na pinis long Westen Hailans Provins.

URGENT!!

URGENTLY REQUIRE STREET SALES AGENTS & DISTRIBUTORS TO DO BULK SUBSCRIPTION OF WANTOK NIUSPEPA IN THE FOLLOWING LOCATIONS

Rabaul, Kiunga, Tari, Jiwaka, Manus, Wabag, Kavieng, Simbu, Tabubil, Lae, Mendi, Bulolo, Popondetta, Wewak, Vanimo and Kerema

Qualification:
No specific qualification is required, can be an individual, family, a retired worker or someone who is already engaged in doing News Paper contract work.

For more detail information please call
The Circulation Supervisor, Mr. Mark Timbi on Phone: 3252500,
mobile phone: 72703860/75690395 or
email: mtimbi@wantokniuspepa.com
circulation@wantokniuspepa.com



PIH Saveman *Nius*

"I kam long Pacific International Hospital Port Moresby"

Ph: 311 3000 and 799 88000 Website: www.pihpng.com

PIH brings to PNG 'Safe and Save - Heart' Surgery



Coronary Artery Disease cuts one down in the prime of one's life.

A valuable life is lost; hard won experience, expertise and ability are lost; the family loses, the village loses, the province loses and the country loses.

All that is preventable. We often hear, or read, that such a life was suddenly, and sadly, lost. But that is equally often not so. Heart disease gives ample warning, but unfortunately we do not recognize the warning symptoms, and signs.

Coronary Artery Disease is patchy, recognizable and correctable. One or several damaged segments, or 'blocks', in our two Coronary Arteries, Right and Left, can be identified and corrected at Pacific International Hospital.

Just as in the past, once again, PIH has brought to POM and PNG gifted, experienced and accomplished hands, that, during the last week of March and first week of April, have corrected such life threatening 'blocks', thus preventing a massive and potentially fatal 'Heart Attack'.



Coronary Artery Bypass Graft (CABG)

Dr.Vineet Sankhla began this "



Diagrammatic representation of Angioplasty

Grateful patients who benefited from their earlier visits have come and met them.

'Safe and Save-Heart' mission by Angiography, Angioplasty and Stenting. Blocks that can be 'Opened' by such procedures are amenable to Angioplasty and

Stenting. But there are more complicated and challenging situations where severe and complete blocks at several levels in the Coronary Arteries and its branches cannot be treated by Angioplasty.

Often these blocks are associated with extensive damage to long segments of the artery. These

are correctable with one of the most effective, efficient and elaborate of Heart Surgeries-The Coronary Artery Bypass Graft surgery, more famously known just as 'Bypass'.

In this surgery, the heavily damaged segments of the Coronary Artery are 'bypassed' by 'Grafts' which are designed from patient's own veins and other healthy arteries.

The procedure is very high tech, precise and painstaking, and

has to be perfect.

To meet that demand for 'Perfection in PNG' Dr Anil Jain and his highly experienced team- Dr.

Rajan Modi, Dr.Vishal Gupta and Dr Naman Sastri, from the internationally reputed SAL Hospital, Ahmedabad, India, are undertaking seven complex surgeries at PIH.

Dr Anil Jain and team operate on a patient in PIH. All the seven are all high-risk procedures.

Two of them have challenging problems besides Coronary Artery Disease. One needs repair of a dilated and leaking Aorta, the body's biggest artery that pumps blood out of the heart. That complicated operation calls for installing new valves and providing a new wall to the Aorta with a synthetic graft. The operation takes several hours.

Each of these operations take several hours, and the entire team works from early in the morning throughout the day.

The other has a severely damaged heart muscle as well whose only hope of survival is a restored blood supply. Thus, at PIH, these two weeks are for 'Brave Hearts', of both patients, their families and their devoted doctors, nurses, and technicians.

Your heart is safe in our hands. PIH

For more information, please visit us at 3 Mile, or call us on 7998 8000 or email us at info@pihpng.com.

Advanced Infrastructure

Quick Turn-around Time

Flexible Timing - All Days

Australia & New Zealand Visa Medicals

Your hassle-free journey begins here. PIH introduces Visa Medicals for Australia & New Zealand.

Now waltz through the health-check for your visa effortlessly with attractive packages



Inaugural Discount **K 100 off!**



CALL 7155 8866



Gabriel Andandi wantaim presiden bilong Tambul-Neblyer Studen Asosiesin long Divine Word Yunivesiti we Gabriel i helpim ol wantaim skul fi moni.



Nudels em i nupela sol

Mi raun long planti ol ples insait long Papua Niugini na mi lukim planti pipel i laikim tumas nudels. Ol i save abusim gut tru nudels wantaim kumu na kaikai.

Mi tingim stori bilong sol na bikpela wok em i bin mekim taim ol waitman i bin kam long ples bilong yumi.

Ol tumbuna i stori olsem taim ol waitman i bin kam na traim long kisim graun ol tumbuna i bin kros planti na tok nogat tru long waitman. Ol tumbuna i no laik tru long usim graun bilong ol.

Waitman i lukim olsem na em i putim liklik sol long tang bilong tumbuna bilong yumi. Taim tumbuna man i pilim teis bilong sol ya tingting bilong em i tanim nau na em i go sanap long sait na larim waitman i kisim graun.

Isi isi pasin bilong yumi long kaikai i senis na nau sol em i stap namba wan samting taim yumi kukim kaikai. Na yumi pasim ai tasol na yumi kisim tasol wanem kain ol kaikai i stap long stua. Na yumi lus tingting long graun. Long wankain pasin nau nudels em i mekim wok. Lukluk long soping bilong mama taim em i maket pinis na i laik go bek long ples. Insait long bilum bilong em i gat sampela nudels.

Isi isi nudels i wok long senisim tinpis. Tasol olsem wanem long naispela kumu?

Bilong wanem na yumi mas tingting gen taim yumi laik kaikai nudels? Hia long Papua Niugini yumi no save ol i save mekim nudels olsem wanem? Ol asples bilong nudels i save kaikai fres nudels, tasol yumi save mekim nating long tu minit nudels.

Wanem samting i rong long nudels em i olsem insait long tu minits yumi kamap long long pinis. Ol mama i ting em i namba wan kaikai bilong bebi na ol i mekim save long givim long liklik bebi ya. Ol i no laik givim Kaukau, pamkin, popo na mau banana we i fres na i gat gutpela marasin bilong banisim sik long bebi.

Yumi ol bikpela i lus tingting long was gut long bodi bilong yumi na yumi hariap tasol long kaikai nudels bikos em i tu minit tasol long redim, na tu yumi bisi long sampela samting. Yumi no laik bisi long lukautim yumi yet. Taim yumi hangamap long nudels yumi les long kukim gutpela kaikai. Yumi les tu long planim gutpela kaikai long ples. Na taim wanpela tret stua i kam long ples yumi save ron tasol long nudels.

Nudels em i gat wok long kisim mani long yumi. Sol i kisim graun bilong yumi pinis. Yumi mas wokhat oltaim long painim mani long baim dispela nudels. Yumi mas lukaut no gut yumi bam!

Bisnis man redi long helpim Pailet trening

Mathew Yakai i raitim

SAPOS wanpela sumatin insait long Tambul-Neblyer elektoret long Westen Hailans husat i laik kamap pilot tasol no gat mani long baim skul fi em nau i gat gutpela nius long kisim mani helpim.

Bipo tisa na wokman bilong UN na nau bikpela bisnisman bilong Tambul-Neblyer, Gabriel Andandi i tok aut klia olsem em bai helpim long baim skul fi. Gabriel em i no nupela long baim fi bilong ol sumatin. Stat long 1997, em i bin baim skulfi bilong ol sumatin long Tambul-Neblyer na ol narapela provins i kam inap dispela yia we em i baim

fi bilong moa long 1,300 sumatin.

"Mi save raun long olgeta hap long PNG na wol na taim mi harim olsem ol Papua, Tolai o Sepik i tok-save olsem ol ranim balus, mi save tingting olsem wanem taim bai wanpela pikinini Tambul-Neblyer stret bai plaim balus olsem Air Niugini or Qantas,"

"Mi salensim ol pikinini bilong Tambul-Neblyer long stadi hat na traim long aplai long kamap pailot na mi bai helpim long skul fi," Mista Andandi i tok.

Mista Andandi i mekim dispela toktok long Sarere Mas 25 long ai bilong moa long 2,000 manmeri long

Wambul viles insait long Lowa Kagul, Westen Hailans provins bihain long em i bin opim wanpela K80,000 nupela bris we em yat i bin fandim. Moa long 40,000 people bai kisim helpim long dispela bris.

"Stat long 1997, mi bin sponsaim moa sumatin bilong Tambul-Neblyer tasol no gat wanpela i bin kisim pilot trening yet," Mista Andandi i toktok.

Mista Andandi stat sapotim ol sumatin bilong Tambul-Neblyer ananit long Tambul-Neblyer Tertiary Students School Fee Initiatives we moa long 1,500 sumatin i kisim helpim long dispela yia wantaim K500,000 olgeta.

Nupela Medikal Bod bilong PNG i kisim opis

WOK bilong nupela Medikal Bod bilong Papua Niugini nau i go bikpela bikos nau em bai lukautim ol kampani tu.

Pastaim tru Medikal Bod bilong PNG i save lukautim tasol wok bilong ol medikal opisa na ol alaid helt wokman na wokmeri tasol nau wok i go bikpela wantaim ol kampani i save salim marasin tu.

Nesanel Seketeri bilong Helt, Pascoe Kase i bin mekim dispela toktok long taim em i tok amamas long ol nupela lain husat i kamap memba bilong Medikal Helt Bod. Em i bin kisim ples bilong Minista bilong Helt na HIV/AIDs, Michael Malabag, husat i no bin stap long dispela taim.

"Mi ting yumi bai gat draipela wok tru. Yumi no moa lukautim marasin na ol alaid wokman na wokmeri, tasol nau gutpela bisnis i kamap long salim marasin olsem na nau yumi bai lukautim ol bisnis na kampani tu," Mista Kase i tok.

Em i tok bod bai mekim wok yet aninit long Medikal Bod Ekt maski em i gat planti asua, em i strongim ol memba long was gut na tingting gut long mekim wok gut.

"I no long yumi bai rejista tasol nogat em bilong yumi gat disiplin tu. Yumi gat wok long mekim long makim gavman na ol pipel na olsem yumi mas was gut olsem wok bilong givim marasin em i bihainim gut ol lo na intenesenel standet," Seketeri Kase i tok.

I bin gat 8-pela nupela memba i



Akauntent Rex Paki i mekim tok promis bilong stap olsem memba bilong Medikal Bod bilong PNG. Foto: Maureen Gerawa.

mekim tok promis long Nesanel Dipatmen ov Helt opis long Waigani, we ol olupela memba bilong bod olsem Anglikan Bisop, Danny Guka bilong Pot Mosbi i bin stap long lukim.

Wok bilong Medikal Bod em bilong rejistaim ol medikal na helt profesenil long kantri. Em i save sekim ol helt fasiliti long lukim olsem ol i opim na wok bihainim ol standet bilong gavman.

Ol nupela bod i bin holim namba wan miting bihain tasol long taim ol i makim ol.

Long Mas 15 nem bilong ol nupela bod memba i bin go insait long Geset. Pot Mosbi Jeneral Haus sik sif sejen,

Dokta Osborne Liko bai stap yet long narapela tripela yia moa.

Ol nupela memba bilong bod em Dokta Robin Sios, papa bilong Paradise Praivet Haus sik long Pot Mosbi i makim Medikal Sosaiti bilong PNG, Rex Paki, Akauntent, i makim Sivel Sosaiti na Ken Wai, Eksekutiv Menesa bilong Startejik Polisi na Plening i makim Helt Eksensen Opisa na Alaid Workman na meri.

Ol narapela em, Profesa Nakapi Tefuarani, i makim Yunivesiti bilong Papua Niugini Skul ov Medisin na Helt Saiens, Dokta Pius Umo, makim ol medikal speselis, na Paul Sai i makim UPNG SMHS.

Wes Nu Briten helpim YWAM Medikal Sip wantaim K500,000

WES Nu Briten Gavana, Sasindran Muthuvel, i givim wanpela sek mani long mak bilong K500,000 ti go long YWAM Medikal Sip las wik.

Dispela sek i bilong inapim ol tok promis bilong provin-sal gavman bipo long helpim operesen bilong YWAM trening na meidkal sip, MV Pacific Link.

MV Pacific Link i bin stap

long provins long sampela mun pinis, long bringim helpim long helt na trening long ol rurel komyuniti wantaim helpim bilong helt atoriti long provins.

YWAM Medical Sip Dairekta, Brett Curtis, i tok em i amamas long strongpela sapot bilong Wes Nu Briten.

"Stat long yia 2010, YWAM Medikal Sip i bringim

moa long 700,000 heltke na trening sevis long planti ples long PNG.

"I gat planti laip we i bin senis olsem Willie husat i bin ai pas inap 11-pela yia olgeta. Bihain long 30 minit operesen bilong ai tasol, em inap long lukluk gen.

"Mi no inap long lusim tingting long taim ol famili bilong Willie i lukim na ol i

singaut wantaim amamas. Taim mipela i rausim plasta long ai bilong Willie, em i laik go long ples hairap tasol long lukim ol tumbuna bilong em. Man em i gutpela tru! Mista Curtis i tok.

Gavana Muthuvel i tok olsem em i redi long tok welkam long MV Pasifik Link long provins bilong em dispela mun.

Gren Sif Sir Michael Somare i ritaia bihain long 49 yia long politiks

Gudbai Gren Sif Somare!



bai long Sir Michael ol i givim bikpela luksave na tok tenkyu tu long meri bilong em, Ledi Veronica. Ledi Veronica i wanpela strongpela mama husat i save sanap baksait long Sir Michael oltaim, stat long taim tupela i bin marit long 1965 i kam inap nau. Ledi Veronica i wanpela strongpela sapota na rida bilong Wantok Niuspepa tu long taim Wantok i stat long 1970. Em tu i ken malolo gut nau na wokabut raun long okid gaden bilong em taim Sir Michael i lusim wok politiks.

Ol kendidet husat bai resis long 2017 ileksen i ken lukim eksampel bilong Somare olsem wanpela strongpela lida. I tru em i no winim ol bikpela skul long yuni-vesiti na kisim ol digri, tasol pasin bilong dispela strongpela kwila bilong Sepik, i soim ples klia olsem em i lida bilong ol pipel.

Tude, mani i wok long grisim ol manmeri long resis long Palamen. Ol i no gat klia polisi o program bilong helpim sindaun bilong PNG. Ol i laik kamap memba bikos long biknem na namba ol i ken kisim long dispela wok. Ol olpela lida olsem Somare i lusim Palamen nau, na ol yangpela bilong tude bai inap winim mak o nogat?

Ol pipel tu i mas opim ai na skelim gut ol manmeri bipo long givim vot. Faivpela yia em i longpela taim na lida bai sanap strong long makim gut pipel o nogat. Yumi yet skelim.

DISPELA wik em i wanpela bikpela wik long histori bilong Papua Niugini. Man husat i bin go pas long kantri long taim bilong Independens, Gren Sif Michael Somare i ritaia long wok politiks. Long Tunde moning, taim Palamen i mekim las bung bilong en, ol memba i tok gutbai long Sir Michael na em i mekim las toktok bilong em.

Sir Michael i bin makim ol pipel bilong Is Sepik inap 49 yia olgeta. Em i bin kamap rijonal memba long 1968 Haus ov Asembli na i holim dispela sia i kam inap nau. Long taim bilong independens, Sir Michael i bin namba wan Praim Minista bilong kantri. Em i bin holim wok bilong praim minista foapela taim.

Ol pipel bilong Is Sepik i wok long salim Sir Michael i go bek long palamen bikos ol i luksave olsem em i wanpela trupela lida bilong pipel. Wok bilong lida long politiks i hatwok tru bikos i gat planti kain kain salens i save kamap. Yumi olgeta i save olsem wok politiks i ken paulim ol lida na mekim ol i lus tingting long ol pipel husat i votim ol i go long palamen. Sapos lida i stap stret na i mekim gut wok bilong em bai ol pipel i holim em yet.

Long dispela de Sir Michael i tok gutbai long ol arapela memba bilong Palmen, em i makim tu de em i bin kamap long Haus ov Asembli olsem memba bilong Is

Sepik long 1968.

Sir Michael i bin mekim sampela gutpela stia toktok long taim em i tok gutbai long palamen na kantri. Em i tokim ol yangpela lida bilong tude long sanap strong na mekim gut wok long makim ol

pipel bilong ol. Em i toktok tu long namba bilong ol politkel pati long kantri. Long taim em i kamap memba, i bin gat foapela pati tasol na tude long taim kantri i laik vot long 2017 nesenel ileksen, i gat 40 politikel pati. Dispela

pasin bilong planti politikel pati i paulim ol pipel na i no inap long strongim wok politiks long kantri.

Ol lida husat i sanap strong long wok i gat strongpela man o meri i sanap baksait long ol. Long taim ol memba bilong Palamen i tok gut-

Ileksen menesa na ritening opisa kisim trening

NAMBA wan level trening bilong ol provinsel ileksen menesa na ritening opisa bilong 2017 Jeneral Ileksen i stat long dispela wik long wan wan ol rijon long kantri.

Ilektoral Komisina Patilias Gamato i tok trening i bilong Ileksen Menesa na Ritening Opisa long kisim ol nominesen bilong ol kendidet husat i givim nem long rit na givim long 2017 Nesenel Ileksen long 20 Epril, 2017.

PNG olsem kantri i redi long go long ileksen long makim ol memba long 10 Palamen," Gamato i tok.

"Mipela i redi long kamapim ileksen bikos plening na wok redi bilong mipela i bihainim wok operesen na nesenel lojistik plen."

Mista Gamato bai opim Momase Rijonal Woksop

long Lae long Tunde long taim Deputi Komisina, Koporet Sevises John Kalamoroh bai Niugini Ailans rijen trening na Deputi Komisina Ileksen Menesa, Simon Sinai i opim Hailans rijonal woksop long Tunde.

Komisina Gamato i tok i bin gat sampela ol senis long Ritening Opisa tasol PNGEC i gat wok long dispela ol tok.

Em i tok em i makim pinis ol opisa na dispela i wetim tasol long gavman i givim luksave sampela taim long dispela wik.

Ilektoral Komisina i tok em i go long ol ileksen menesa na ritening opisa olsem: "Holim Mama Lo bilong yupela na mekim wok stret. Ol manmeri bai kaulim yupela long kamapim fri, fea na seif ileksen.

Gamato: Program bilong 2017 Ileksen i stap wankain

ILEKTORAL Komisina Patilias Gamato i mekim klia long ol de bilong holim 2017 Nesenel Ileksen.

Dispela ol de em ekting Gavana Jeneral Theo Zurenuc i tok orait long las mun na dispela ol de i no senis.

"De bilong ol 2017 Nesenel Ileksen i no senis na mi no tokaut long nupela ol de," Gamato i tok.

Em i mekim dispela tok bihainim ol ripot PNG Loop onlain i kamapim na redio i tokaut long las wik Sarere 1 Epril, 2017 olsem ol i senisim de bilong ileksen.

"Dispela i no tru. Mi no givim wanpela tok long Gavana Jeneral long de bilong ileksen bai senis. Olgeta de mipela i makim i stap wankain.

"Ol lain husat i mekim dispela giaman tok i mas lusim. "Dispela em i bikpela hevi

na ol i painim yu wok long givim giaman tok, polis bai sasim yu aninit long lo bilong ileksen," Gamato i tok.

"Yupela ol jenelis i mas was long kain ol tok giaman na lukim olsem yu mas sekim Komisin bipo long yu putim kamap nius."

"Bipo long toktok i kamap, wanpela hap bilong kisim toksave na tok orait long tokaut em long opis bilong PNG Ilektoral Komisina."

Nau yet ol de bilong Ileksen i stap olsem:

- 20 Epril 2017, givim bilong rit na nominesen i op;
- 27 Epril 2017, nominesen i pas;
- 24 Jun i go long 8 Julai 2017 - poling i kamap
- 24 Julai 2017 - ol rit i go bek long Gavana Jeneral

Benong Peris i selebretim wol disabiliti de



STORI TASOL
wantaim
Fr Paul Liwun

Lusim rong bilong narapela

Joyce Huanjo i raitim

OLGETA manmeri i gat wankain namba long ai bilong God.

Misin Wan Wol Seketeri bilong Papua Niugini, Pasifik na Is Esia, Dokta Traugott Farnbacher i mekim dispela toktok long taim bilong opim Nesanel Disabiliti de long Benong Peris long Lae.

Ol i bin holim wanpela liklik selebren tasol we ol Luteran bilipman na meri husat i gat disabiliti long Bumayoung na Tent siti i bung long Benong Peris long makim dispela spesel de.

Lida bilong ol Luteran meri, Baine Matango i tok olsem planti pipel i askim planti long God long wanem as na i gat disabiliti long graun.

Misis Matango i tok moa God i kamapim ol pipel wantaim disabiliti em i gat spesel wok bilong ol. Ol dispela pipel husat i gat Disabiliti na ol lain i lukautim ol i mas tokaut long



Misin wan Wol Seketeri lukautim Papua Niugini, Pasifik na Is Esia, Dokta Traugott Farnbacher i toktok long taim bilong Nesanel Disabiliti de long Benong Peris, Lae. Foto: Joyce Huanjo

God em i husat long laip bilong ol moa.

Em i tok sori tu long ol pipel wantaim disabiliti long ol i no save kisim inap helpim ol long ol nid bilong ol.

Tisa na ol sumatin bilong Benong Elementeri na Sen Thomas Luteran Praimeri Skul husat i gat sampela kain disabiliti o i no inap long yusim sampela hap bodi bilong ol

gut i bin kamap long makim dispela de.

Benong Elementri Skul Tisa, Helen Esso, husat em yet i gat disabiliti, i salesnim ol papamama na ol lain i save lukautim ol PLWD long ol i no ken haitim ol pikinini insait long ol haus.

Em i tok olsem ol dispela pikinini i wankain tasol olsem ol narapela pikinini na ol tu i gat rait long kisim edukesen.

Evanjelikal Luteran Sios bilong Papua Niugini Disabiliti Program Kodineta, Dalina Bakine, i tok Benong Peris i wok long traime nupela disabiliti projek bilong ELCPNG.

Dispela em i namba 5 yia long Benong Peris long selebretim dispela de.

Long wankain taim Wol Seketeri bilong Papua Niugini Pasifik na Is Esia, Dokta Traugott Farnbacher i tok olsem sios bilong em long Bavaria, Germany i gat tingting long sapatim wok bilong disabiliti.

Pop Francis i bungim Prins Charles

PRINS Charles na meri bilong em Camilla i bin bungim Pop Francis long Rom long Mande apinun. Dispela em i namba foa taim bilong Prins Charles long go bungim wanpela Pop long Vatiken tasol em

i namba wan taim bilong Prins Charles long bungim Pop Francis.

Ol i bin toktok long planti samting long dispela bung. Na bihain long dispela bung, Pop Francis i bin givim wanpela han bilong oliv diwai ol i wokim long brons na Prins Charles i givim basket kaikai ol i groim long fam long Royal Estate long Highgrove. Bai Pop i tilim ol kaikai i go long ol tarangu na ol lain i no gat ples bilong slip.

Prins Charles wantaim Foren Ofis Minista bilong Stet bilong Yurop na Afrika, Sir Alan Duncan i bungim Kardinal Seketeri bilong Stet, Kardinal Pietro Parolin.

Prins Charles na meri bilong em i lukluk raun long Vatiken Sikret Akaiws na Vatiken Laibri na lukim ol impoten samting i gat histori bilong ol kain kain samting long wol. Bihain long dispela ol i bin bungim ol pipel bilong Ingran husat i stap long Rom.

Prins Charles na meri bilong



Prins Charles bilong Ingran wantaim meri bilong em Camilla i bungim Pop Francis long Rom. Foto: Zenit

em i raun nau long Yurop na ol i wok long toktok long sindaun bilong Yunaitet Kingdom wan-

taim Yurop. Long 2005, Prins Chares i bin go pas long ol deligenes bi-

long Briten long funeral sevis long taim St John Paul II i bin dai.

Long wanpela Skul, taim RE lesan i kamap, tisa i askim olgeta sumatin.

“Husat namel long yupela i gat rong long narapela o narapela i mekim rong long yu na yu i no lusim rong bilong ol yet?”

Klostu olgeta sumatin i gat dispela pasin bilong i no lusim rong bilong birua bilong ol.

Olsem na tisa i tokim ol: “Tumoro, olgeta sumatin i no lusim rong bilong narapela yet, i kam long skul na bringim wantaim yu tomato i mao pinis. Wan wan i bringim tomato mao bihainim namba bilong ol manmeri yu no bin lusim rong bilong ol yet”.

Neks de olgeta sumatin i gat birua wantaim narapela i kam na putim tomato mao insait long poket bilong ol. Namba i narakain narakain long wan wan sumatin. Sampela i bringim 5-pela, sampela i bringim tupela na sampela i bringim wanpela tasol.

Tisa i tokim ol: “Dispela tomato mao, yu mas karim long olgeta hap yu go. Taim yu stap long klas, putim long des bilong yu. Sapos yu go long toilet o pilai long taim bilong brek yu mas karim wantaim yu olgeta taim”.

Olgeta i amamas long dispela wok na bihainim stret wanem samting tisa i tokim ol.

Namba wan na namba tu de, olgeta i amamas yet. Tasol sampela de bihain sampela sumatin i stat long komplek bikos tomato bilong ol i sting na smel. Sampela i komplek bikos tomato i bagarap na bagarapim klos bilong ol tu.

Sixpela de bihain, olgeta i straik na tokim tisa long larim ol i go fri. No ken karim tomato gen.

Tisa i harim komplek bilong ol na i tok: “Nau yupela i save a? Sapos yu karim tomato mao i bagarap pinis olgeta de long laip bilong yu, yu pilim les bikos smel bilong em i kamap nogut na wara bilong em i bagarapim klos bilong yupela. Yupela i save komplek long dispela samting. Bilong wanem yupela i no komplek long olgeta sin o rong yupela i karim olgeta de wantaim yu?”

Tomato em i mak bilong sin. Sapos yumi larim sin i stap wantaim yumi olgeta taim, em i bai mekim yumi i kamap sting na smel olsem yu karim tomato i sting pinis wantaim yu olgeta taim.

Olsem na, long dispela taim bilong Ista, no ken holim bek ol sin bilong yu wantaim yu. Kam long God na konpes long em. Askim em i rausim sin bilong yu olsem ol sumatin i kam long tisa na askim tisa long rausim tomato i sting pinis long en. *****

Nupela CARITAS Sekenderi Skul long Kimbe

Sr. Florentina Cho, CSJ i raitim

BIHAIN long namba wan misineri wok long Papua Niugini (Araimiri Don Bosco, Kerema daiosis long 1986) ol Caritas Sista i opim Caritas Sekenderi Teknikal Girls Skul long East Boroko, Pot Mosbi long 1996.

Twenti yia bihain, ol strongpela misieri sista i opim gen narapela wok long Kimbe, Wes Nu Briten. Bihain long planti toktok na planti wok rere, Sista Sara Florentina Cho, ol tupela fauna, i go

sindaun long Kimbe long stat bilong Desemba 2016.

Olsem na namba wan skul yia i stat long 2017, wankain olsem long Bethlehem, ol i rentim wanpela haus bung bilong lokal Katolik peris na wantaim tupela giaman klasrum ol i statim nupela skul bilong ol. Stat tru bilong skul i kirap long Februeri 6, 2017 taim ol i redim olgeta rejistresen bilong ol namba wan sumatin, ol gret 8 greduet na ol i holim wanpela seremoni bilong opim skul yia.

Narapela grup klas em ol gret 10 greduet skul meri bilong Kimbe we ol i askim

ol Caritas Sista long kisim ol tu long skul. Sista Sara na Florentina i wanbel long larim ol dispela gel husat i stap ausit long skul pinis long kam insait olsem na long Februeri 13 ol i statim namba wan gret 10 klas wantaim tenpela sumatin na long Februeri 20 narapela 100 sumatin i kam insait long wokim gret 11 klas. Long dispela taim nau i gat 115 pikinini meri i skul insait long nupela Kimbe Caritas Sekenderi Teknikal Skul.

Ol Caritas bilong Jisas Sista i stap namel long 31 opisal memba bilong Sale-



Ol namba wan meri sumatin bilong Caritas Sekenderi Teknikal Skul long Kimbe.

sian Famili, na ol i gat 980 Sista nau i stap long 15 kantri long wol. Long Korea - Seoul provins bilong Caritas Sista bilong Jisas i lukautim Papua Niugini misin long Pot Mosbi na Kimbe. Nau

wantaim nupela Sekenderi Teknikal Skul wantaim 7-pela Sista bilong Jisas. Sampela ol kendidet bilong PNG long relijes laip nau i stap long fomesen haus long Quezon Siti - ManilaFilipins.

Caritas Sista bilong Jisas i askim yu long pre long ol dispela nupela misin long Papua Niugini. namba wan konven bilong ol long Kimbe i stap long naispela kala, kala 20 tan retpela kontena!



Seif pablik transpot bilong ol meri

Ol meri husat i save kalap long Meri Seif bas i amamas long taim tebol bilong ol bas long siti.

POT Mosbi Siti atoriti nau i gat taim tebol bilong Meri Seif bas insait long siti.

Ol Ginigoada Seif Pablik Transpot Program aninit long UN Women i bin tokaut long dispela long Mas 29, 2017.

Ginigoada wantaim UN Women i bin wok bung wantaim aninit long dispela program, Seif Pablik Transpot Program, kamapim seif transpot bilong ol mama na ol yangpela meri long Pot Mosbi.

Stat long yia 2015, Ginigoada i bin ranim 4-pela bikpela bas bilong ol meri tasol long kalap insait long

siti na ol i bin save karim 650 meri long wan wan de i go i kam long wok na maket samting.

Wantaim nupela taim tebol, dispela ol bas bai sevim taim bilong ol meri i wokabout na tu em bai go het long lukautim sefti bilong ol insait long siti. Taim ol meri na ol yangpela gel i lukim taim tebol bilong ol bas bai ol inap long mekim plen bilong ol gut long wanem taim bai ol i ken ran long bas i go long ol ples ol i laik go long en.

Dispela projek i bin kamap

bihain long ol ripot ol i bin kisim long wanpela stadi bilong sefti bilong ol meri. Ripot i soim olsem 97 pesen bilong ol bikpela meri na yangpela gel i no save pilim seif long sanap long ol bas stop insait long siti long wetim PMV bas.

Wantaim taim tebol dispela program i kamap moa seif bikos ol meri bai i no inap long wet longpela taim long bas stop, westim taim na painim birua.

CEO bilong Ginigoada Pasto Mike Field i tok amamas long dispela na i tok

olsem: "Mipela i hop olsem bai wanpela taim i kamap we ol meri i no ken gat bas bilong ol yet, tasol nau yet em mipela i mekim dispela long givim sevis long ol meri husat i laik long kalap long Meri Seif bas."

Lizzette Soria, UN Women Seif Siti Program Speselis i tok, dispela i gutpela projek long helpim ol mama na ol yangpela meri.

"Mipela i laikim dispela rot long kamap seif na gutpela long givim moa taim long ol meri i mekim gutpela wok!" em i tok.

SAVE na MEKIM

Sapta 2

...moa yet long hap 1 (KON) Kaikai bilong givim strong

KON (MAIS)

Tok bilong binatang

Wanpela binatang i save kaikai as bilong kon. Marsin bilong dispela em i Lindane Granules. Tasol mobeta yu planim kon long graun i gat gutpela gris na bai yu no ken wari long dispela binatang wantaim marasin bilong em.

Wanpela binatang i save bagarapim kaikai bilong kon. Marasin bilong dispela em i 0.1% Carbary, na yu mas pamim long olgeta wik. Em i hatwok. Na marasin i gat pe. Olsem na maski marasin. Mobeta yu planim kon long graun i gat gutpela gris, na bai i no gat planti binatang tumas.

Wanpela binatang i save bagarapim katim nupela kru bilong kon. Em dispela liklik lakpela snek i save hait long graun klostu long as bilong kon. Ol didiman i kolim kwatwem. Em i save kamap planti, sapos yu wokim nupela gaden kon long ples kunai. I gat tupela marasin bilong en, wanpela em i CKTox, narapela em i 0.2% Lindane. Yu ken pamim taim kru bilong kon i kamap nupela.

Wanpela binatang i save go insait long nupela lip bilong kon na bai lip i tanim i go yelopela na i bruk long namel. Marasin bilong dispela em i DDT. Tasol maski marasin, sapos dispela binatang i bagarapim wan wan kon tasol long gaden bilong yu. Bai kon i no dai. Bai nupela lip i amap gen na i go strong. Na sapos dispela binatang i laik bagarapim olgeta kon bilong yu, orait, lusim dispela hap graun na traim long nupela gaden gen.



Skul Midia Awenes

Marianville sumatin i soim Skul Nius Buletin bilong ol we ol i bin kamapim long taim bilong Skul Midia Awenes trening long Don Bosco Insitut, Pot Mosbi long las mun. Poto Fr. Ambrose Pereira sdb.



Rot na bris tasol bai kirapim divelopmen



“Guia” singsing em ol Poika, Paglme na Gaulga traib i kamapim long Glama Pena, Wambul viles, Lowa Kagul, WHP.

MI sanap antap long Het Pass, bipo ol kolim Gun Pass na lukluk i go na lukim Malga Green Valley i go inap mi lukim Mt Giluwe i sanap sori stret.

Het Pass em i stap long boda bilong Lowa Kagul na Apa Nebliya long Westen Hailans.

Dispela 15 km Wambul Pokrapulk rot em wanpela bus rot we taim mi liklik manki long 1980s, mipela save raun i go na painim bus karuka. Long dispela taim tu, wanpela bikpela pait i bin kamap namel long Lowa na Apa Kagul lain we ol lain long Lowa Kagul i bin wokim rot long han na save wokabaut i go olgeta long Pokrapulk na kisim PMV go long Wabag-Mt Hagen haiwe.

Bihain long 27-pela krismas we mi no go long ples na long Mas 24, 2017 em namba wan taim mi krunkutim Het Pas na lukluk i go daun long Wambul na Malga Green Velly we tupela i silip sori stret. Mi kisim strongpela kol win we mi pilim stret long bun wankain olsem long taim mi liklik manki na wokabaut long hap.

Gaulga Bernard, driva bilong mipela I karim ol sumatin bilong long kar em ol sumatin bilong

UNITECH, Balop Teachers College, Divine Word University, Madang Teachers College, University of Goroka, Simbu Teachers Collage, Jiwaka Teachers College na dispela newsman long wanpela ten sita lendkrusa.

Bikpela saveman bilong Wambul asples na bipo wokman bilong Yunaitet Nesen na wanpela bikpela bisnisman, Gabriel Andandi i kisim mipela i go long witnesim nupela Kurpir Bris long Wambul-Pokrapulk rot.

Ol sumatin em sampela bilong ol 1,500 sumatin we Gabriel i save baim skul fi bilong ol.

Kurpir Bris em ol i bin wokim long K80,000 Gabriel Andandi i bin givim long joinim ol 40,000 lain populesen long Lowa Kagul long ran i go long Apa Nebliyer na Mt Hagen siti.

Ol Saina save tok olsem wanpela kantri i no inap diveop sapos no gat gutpela rot bilong kar na bris. Tasol planti rot insait long PNG save bagarap na graun buruk nambaut tasol save na teknologi bilong man tete i antap moa na PNG i ken lainim long ol bikpela kantri olsem China, Japan, Australia na Amerika.

Yumi ken kisim save na teknologi bilong ol long kirapim bikpela na strongpela rot na bris insait long PNG.

Taim ol lonsim Kurpir bris long Mas 25 wantaim bikpela “guia” singsing, moa long 2,000 pipol i kamap long Wambul Pena na i luksave olsem Wambul-Pokrapulk rot na Kurpir bris i ken helpim ol pipel bilong Lowa Kagul.

Dispela em ol pipel husat i save wok fama na kamapim ol kumu na kaikai olsem kapis, brokoli koliflawwa, kerot, poteto na ol narapela kumu we save kamap long Mt Hagen maket na ol narapela provins tu.

Ol pipel bilong Lowa Kagul i save stret long wok long graun na kamap fama bikos no gat ol narapela risos long kisim mani. Na sapos i gat gutpela rot na bris bai ol pipel i wok hat na kisim ol kaikai i go long ol maket na kirapim gutpela laip na sindaun insait long kantri.

Taim Gabriel i opim Kurpir bris long Mas 25, em i bin kisim wanpela kontrakta long stretim rot na putim wesan. Em i haiaim 2-pela masin na 2-pela trak long wok insait long 3-pela wik na pinisim rot

hariap.

Tupela sumatin long Tambul Haiskul bipo husat i na bisnisman, James Kennedy i donetim 10-pela fiul dram na Bakri Win Dake i givim damp trak long wokim rot tu. Gabriel, Bakri na James ol i gat bikpela diriman long lukim dispela rot i mas kamap gut kisim bikpela sevis i go long ol pipol bilong Lowa Kagul.

Taim ol Poika, Paglme, Mundika na Gaulga tribe i putim bilas pisin kumul na pen na wokim “Guia” singsing, man ol kamap nais stret na kumul pisin gras bilong ol em sutim stret maunten Kunuming na Mt Giluwe.

Taim ol lapun long ples i sindaun na lukluk long lek na bilas bilong ol, em ol daunim het na wanbel olsem pasin kalsa i stap yet tasol divelopmen em mas kamap bikos taim i senis na kantri tu i senis.

Long Mas 26 taim mipela laik kam bek na kamap long Murmur Pass, mi lukim Maunten Hagen i slip sori antap long Tomba na baksait tasol em Mt Giluwe i sanap sambai.

Taim dispela tupela maunten save no gat klaut na ples i sain stret, em mak nogut we bikpela ais

save pundaun na Tambul-Nablyer i save kisim taim long hangre stret.

Tasol me lukim Mt Giluwe na Mt Hagen i karamap wantaim klaut na ren tu i pundaun antap long tupela. Ating tupela krai long mi long dispela 3-pela de tasol mi stap long ples bihain long 27 krismas mi bin lusim ples Yapalgu.

Wanpela bisnis man bilong Amerika, Warren Buffett i tok, “no ken askim man save katim gras bilong man olsem yu laik katim gras bilong yu, o no ken tokim skul tisa wanem samtin gem tisim ol sumatin long klasrum em orait”.

“Olsem na mi les long askim God bilong wanem em lusim 40,000 pipel bilong Lowa Kagul i safa na laikim gutpela bris na rot tude.”

God bilong mi em save long tingting bilong mi na bekim long Matthew: 26:41: “Kisim was gut na prei olgeta taim na no ken i go insait long planti traime pasin na temtesin”.

Ok mi wanbel tasol sapos God i putim ol lida man na meri long posisen we ol i no kamapim gutpela bris na rot bilong mi ok tumora tasol bai mi putim han mak bilong mi na makim nupela man long dispela 2017 eleksen.



Lenkrusa wantaim ol sumatin sanap antap long Het Pass long Wambul-Pokrapulk 15km rot.



Lenkrusa i traime long kalapim Wambul-Pokrapulk maunten.



Gabriel Andandi i givim K80,000 long wokim Kurpir Bris.

Maket long lukautim pikinini i pinisim skul

...Laikim wanpela maket tasol long Rainbow

Veronica Hatutasi i raitim

MAMA Margaret Pomu i save maket long Rainbow maket long NCD, wantaim strongpela tingting long putim olgeta pikinini bilong long skul na pinisim skul gut na kisim wok.

Margaret i bilong Hagen long Westen Hailans Provins, tasol nau em na famili bilong em i stap long Baruni.

Margaret i marit na man bilong em i wok long G4S sekyuriti kampani. Ol i gat 5-pela pikinini. Namba wan pikinini man i wokim Gret 10 na ol arapela i stap long praimereri skul yet.

Rainbow maket i narakain liklik bikos em i gat tripela liklik maket, na ol i stap klostu klostu.

Namba wan i stap insait long banis bilong Stop N Shop, namba tu i stap long Stop N Shop bas stop stret na namba tri i stap insait long banis bilong Cash & Carry stua.

Dispela tripela maket i save op long apinun, long samting olsem 4 klok taim san i go daun na ol wok man-meri i pinis long wok na tu taim ol mama i laik go painim ol gaden kaikai bilong kuk long ol famili bilong ol.

Tripela maket i save salim kaukau, poteto, banana, singapo, pamken, kokonas, ol kain kain kumu olsem aibika, pamkin, aupa, kabis, anian, kerot, kawawar na ol prut olsem banana, popo, painap, kukamba, na melon.

Maket long Stop N Shop na dispela long Cash N Carry banis i save salim fres pis. Ol asples bilong Sentral provins olsem long Hula, Aroma na pleslain bilong ol Motu viles olsem Gaire na Porebada i save karim ol eski i pulap long pis na salim long tupela maket ya.

Planti lain long ol narapela hap bilong Mosbi siti i save kam long dispela tupela pis maket na baim ol naispela fres pis.

Margaret i save maket long maket namba tri insait long Cash N Carry banis. Meri Wantok i bin bungim em na ol i stori

long maket bilong em.

"Mi save salim kaukau, banana, poteto na kokonas insait long 5-pla de in long wan wan wik. Mi maket long Rainbow maket long tupela yia nau," Margaret i tok.

Em i stori wantaim Meri Wantok long ol gutpela sait bilong maket, ol salens na watpo em i maket, na tu, em i autim tingting bilong em long maket long Rainbow.

"Mi save baim bek kaukau long ol Hagen lain i kam olgeta long Hagen yet. Taim em i sisen bilong kaukau, prais bilong wanpela bikpela bek i stap namel long K60-K70 o K100 na K120.

"Wankain long poteto we mi save baim long ol Hagen. Mi baim wanpela bek poteto long K200, taim i gat planti poteto. Tasol taim poteto i sot, prais long wanpela bek i save go antap long K300.

"Wanpela bek i save stap wanpela na tupela wik long salim.

"Mi save baim wanpela bek banana namel long K70 na K100.

"Long gutpela taim, mi ken kisim namel long K70 na K100 insait long wanpela de. Tasol taim i no gutpela, mi ken kisim namel long K30 na K40.

"Mani mi kisim long maket i helpim mi long baim skul fi bilong ol pikinini, ol klos, lans kaikai, bas fe na long helpim man bilong mi long lukautim famili," Margaret i tok.

Wanpela wari Margaret i autim em, long sotpela taim bilong maket namel long 3 na 4 klok apinun, na tripela maket i stap klostu klostu long wanpela eria.

"Long moning i kam inap apinun, mi stap nating na mi no maket. Tupela awa i sotpela taim tumas.

"Ol kastoma i save go long wanem maket long tripela hap, na bikos mi sindaun long maket namba tri, planti kastoma i save abrus na go long maket namba 1 na 2. Tasol taim ol kastoma i laik baim pis, long Cash N Carry, ol i save painim tu ol gaden kaikai na em long dispela taim ol i save baim kaikai bi-



Narapela mama wantaim kumu kangkong em i salim long Rainbow Cash N Carry banis maket.

long mi," Margaret i tokim Meri Wantok.

Margaret i tok em bai maket yet inap ol pikinini bilong em i pinisim skul bilong ol.

Wanpela strongpela askim we Margaret i wokim em long ol atoriti insait long NCD.

"Sapos ol maket atoriti na ol NCD i ken wokim wan-

pela maket tasol long Rainbow i gat gutpela haus na ol tebol ol mama i ken sindaun gut na maket aninit long em, na i gat wara na toilet long em, bai gutpela tru. Dispela bai helpim ol mama long maket long moning inap apinun long olgeta de," Margaret i tok.



Wanpela kastoma i laik baim pis na i skelim i stap.



Margaret Pomu wantaim ol maket kaikai bilong em long salim.



Wanpela mama i lainim ol potato i stap

Lukluk long ol piksa bilong Gren Sif Sir Michael Somare long las palamen bilong em. Planti long ol memba i tok amamas long em na tok gutbai. Ol memba husat i stap long Gavman bilong em bipo i tokaut tu long ol stori bilong ol wantaim Gren Sif Sir Michael Somare. Sampela Stori i pani na sampela em sori.



Gren Sif Sir Michael Somare i ridim las toktok bilong insait long Palamen Haus. Dispela sia em sindaun long em tu em las taim bilong em long sindaun.



Ol memba bilong tupela sait bilong palamen haus i kam bungim Gren Sif long namel bilong semba long kisim poto.



Gren Sif i lap long sampela bilong ol memba long sampela pani stori insait long semba.



Gavana bilong Milen Bay Taitus Philimon i givim presen bilong ol pipel bilong Milen Bay go long Gren Sif.



Gren Sif Sir Michael wantaim Lady Veronica Somare i amamas na wokabaut go long C wing bilong Palamen Haus.



Tupela bes poro man bilong bipo i amamas, tupela save bung olgeta taim. Sir Dadi Toka na Gren Sif Sir Somare.

STORI BILONG TUMBUNA

Dok Kamapim Raunwara

Bipo tru i no gat wara long lek Kutubu long Sauten Hailans. Nau planti manmeri ol i no gat wara na ol i hangre long wara.

Tasol wanpela viles i stap klostu long Kutubu, nem bilong dispela viles Topua. Long dispela ples i nogat planti manmeri i stap. Wanpela yangpela meri na wanpela dok tasol i stap long Topua. Tupela i gat lanti kaikai i pulap long gaden bilong tupela. Tupela i save kaikai ol kain kain kaikai tasol i no gat wara bilong dring. Tasol oltaim dok i trikim yangpela meri na em i save i go long bus na dringim wara. Long wanpela san meri i tokim dok long go painim wara long bus. Tasol dok i tokim meri olsem: "Yu longlong meri. Mi kisim wara we nay u tok olsem long mi?"

Nau yangpela meri i sem na i tok, maski mitupela i go long haus. Nau tupela i go long haus na yangpela meri i kukim kaukau na tupela i kaikai. Dok i kaikai pinis na

em i go long bus bilong kisim wara bilong en yet. Nau em i kam bek long haus bilong tupela.

Tupela i slip na long moningtaim tupela i kirap na kukim kaukau na tupela i kaikai. Na bihain dok ya i go gen bilong kisim wara bilong en yet. Bihain em i kam bek long haus. Nau yangpela meri ya i lukim nus gras bilong dok.

Em i lukim liklik wara i stap long nus gras bilong dok. Dispela taim yangpela meri i tingting planti. Nau dispela taim yet yangpela meri i wok long tanim rop. Em i tanim rop i sta inap wan mun i go pinis. Wanpela taim gen dok i kisim kaikai na em i go long bus na kisim wara bilong en yet. Dispela taim yu yangpela meri i kisism rop na i pasim long tel bilong dok na em i bihainim dok i go klostu rop i go pinis na yangpela i was i stap klostu long wanpela

diwai i mau.

Nau dok i go antap long wanpela bikpela diwai pikus na em i dringim wara. Bihain em i laik i kamdaun na nogat yangpela meri ya em i bikmaus.

Yangpela meri i tok, E, e, yu mekim wanem? Dok i sem na i tok, "mi dringim wara." Bihain yangpela meri ya i holim dispela bikpela diwai pikus na i pundaun na bruk na i pundaun na bruk bruk. Man, dispela taim wara i laik kisim olgeta ples. Yangpela meri ya klostu wara i laik kisim em.

Dispela taim dok i tok: "I pu Kutubu yura yu tengteng." Dispela tok i olsme wara Kutubu, yu no ken kamap bikpela. Dispela taim wara i stap em i no meknais. Nem bilong dok Nol na nem bilong meri Temoki.

Taim mipela i go long Kutubu, mipela i save lukim dispela bikpela diwai pikus




long namel tru bilong wara. Nau mak bilong dok tu i stap long dispela diwai. Taim yu go long Kutubu yu inap lukim planti dok i stap arere long wara Kutubu.

Sapos dispela yangpela meri i no mekim olsem in-

sait long Sauten Hailans miple ai no inap dringim wara na i stap. Mipela bai kaikai kaukau tasol na i stap.

Ol dok tasol ol bai dringim wara. Yu no inap lukim wara Kutubu i kamap long wanem i stap tasol.

Em nau! Ol pikinini i ken painim rot i go long ples wanbaim Wantok lain...



Yu pinis! Em ples bilong yu

Ansa bilong Wod Pilai isu 2219

IXGZSERNKRC DLOJQZIGMWEWIT SGAOFDAEMOE EAITIIEAMSEAOR OPFWCIPATBIGEEARGEXIKENFE NHOMSJFPRCIHIDGHIHAPLETA S TSFJIWSIDAKURSFLSDLYIGIBO HVMAEULUMXOEMKRNEOYCIDENG BLTIENDRGTLRREITMCTOTLPUCM FSEPONOTMEOFERHPBIPOAREIU HECIGCRLRIA GHNLEINSKSSNK S PSASSPABCKPYSGWSLASAFAEYB VAKNRENFPGRZAESNEPOUMRENT CNTCSRITUSUTSMTAQQETIZBDP RGP SIYSGNMSSTAARWUAAHEIG DESGIRPYQSGPHBUKAGFLFOEEE CMEFACRWHTVIUJTRNBETJFPDE INXDAIGVOAKZPSAAPPEAELISG UFNHGH SJHTMTENRQISLLENLD TILAPNRGUMDDHKYALEGOLIFCO IPUDEQMO SUNPOERMARBELONTE EMGIJXXQXMR LTOBRINGIMTUOE

PAINIM WOD PILAI

Ol wod lista:

- WETKOT
YIS
TOKSAVE
SOK
LUKAUT

- PREN
VUN
STRONGIM
KUKA
PAS
ING (3)
TOKBAK

- MALIP
KASTAM
BULITIM
HET
KAWAWAR
AIAI
GIT

- BRINGIMAPIM
NES
BANARA
KAUKAU
MET
NARAKAIN
PATI

OGMHSREWYTESLDPPTTSIGWC ONP
ARESJRHAWHEKB FNICAHHEBNGQ
RNGRIDPYPRENCBANARAVSOIXK
KMMEYOTBVVAZAMRS GIGALQFOES
YZFPST SXCHRSZIEEVSMOIXSTJ
WEUTJDNSTBAEYNMRKSTSNMBFS
MSEKRHKMNOYLGGEOMAVSGDXXA
NIPC OLOUNCBULITIMWUSCBFPR
KLMRAPEEKSSJNMSRIO SKACRSL
EUFETTNNZAHMAATZCEAOALYEE
FAEXNIFHRMALIPRKL L SXQULEA
DNBEAWKEKTDTAIOAEUITAPTEI
OMLAMRBT S OOTIMNWKKERFGMI I
WPHFDCVAEKVVASGAPAGTMSFSF
ARAUTRKSTBNQA TIWCUIPEUWPO
HWDIMABEOADPFQMAYTTNHMK N
RSWNLAWHGKMS EFNRAFXLCCRSH
FPEDOYENZYYI ICTPTTPBNJXHAK
EJSRMKUARZTGESLOTEEHNERSW
JSRLXVMIFGPVRCVPUEQE VETRQ

Saiklon Debbie kamapim bikpela tait long Kwinslan na Nu Saut Wels



Ol fam arere long Wilsons Riva i stap aninit long wara bihain long wara i brukim banis long Lismore, Nu Saut Wels.

Graun malmalum na tait bagarapim Kolombia

GAVMAN bilong Kolombia i tok ol i painim pinis bodi bilong olgeta pipel husat i dai bihain long graun malmalum i bin kapsait i go insait long Mocoa siti long las wik Sande. Presiden Juan Manuel Santos i tok 254 pipel i bin dai long dispela birua.

Strongpela ren long Fraide na i bin mekim tripela bikpela riva i solap na karim graun na ol pipia i go insait long Mocoa siti.

Presiden Santos i tok 43 pikinini i bin dai na 22 moa i kisim bagarap na i stap long haus sik nau. Samting olsem 203 pipel i bin kisim bikpela bagarap tru.

Em i salim tok sori bilong gavman i go long famili bilong ol dispela lain husat i dai long dispela bikpela birua.

Tait wara i banisim rot

Long taim bikpela ren i wok long pundaun long las wik Fraide, Simon Uribe na famili bilong em i lusim rum we ol i save stap long muv i go antap long narapela plua i stap antap. Long taim tait i kapsait long strit, haus bilong ol i stap namel long strongpela tait tru. I no gat pawa na ol i stap long ples tudak.

Em i tokim CNN nius olsem ol i lukim wara i karamapim planti hap bilong siti. Em i tok tu olsem em i lukim wara i karim ol meri na sampela bodi bilong ol pipel.

Uribe na famili bilong em i bin laki long ranwe lusim haus na i go long ples i stap antap long manuten; Long moning em i go long sekap

long haus bilong em tasol i no gat haus moa, graun tasol i karamapim ples we haus i bin sanap bipo.

Resis long sevim pipel

Moa long 1000 soldia na ol polis i bin mekim wok bilong sevim ol pipel long taim dispela birua i bin kamap.

Ol i tok wok bilong ol i hatwok moa bikos ren i wok long pundaun yet na graun i bruk i go daun na pasim ol rot. Ol i no inap long save we rot i pinis bikos ol i no inap lukluk gut bikos ren i bin strong tumas. Ples we bikpela graun tru i bin bruk i go na kilim ol pipel i bin stap longwe olsem na ol polis i go kamap tripela aua bihain.

Presiden Santos i tok ol trak i karim wara i go long Mocoa na ol i putim masin bilong klinim wara pinis. Em i tok wanpela haus sik i opgen bihain long ol balus i karim ol medikol saplai i go.

Presiden Santos i tok tu olsem gavman bai sanapim ol haus bilong ol pipel husat i no gat haus nau na ol dispela haus bai i gutpela na seif moa long olpela haus. Gavman bai givim \$87 long ol famili long wan wan mun inap haus bilong ol i redi. Em i tok Hausing Minista i statim wok nau long sanapim ol nupela haus.

Wanpela NGO grup Save the Children i tok i gat 70 pikinini husat i no inap painim papamama bilong ol bihain long dispela birua. Dispela ogenaisesen bai i helpim ol dispela pikinini na ol arapela famili husat i bin kisim

bagarap long dispela birua.

Watpo graun i bruk

Ol saintis i tok i gat planti as bilong tok watpo graun malmalum i save bruk i go daun na bagarapim ples. Sampela bilong em sapos ol pipel i katim daun olgeta diwai, sapos ol pipel i wokim ol setelmen haus na sapos planti pipel tumas i bung na wokim ol haus long wanpela liklik spes.

Long mun Epril na Mas em i taim bilong ren na long dispela taim graun i save pulap tru long wara na bikos i no gat moa ol diwai long strongim graun long maunten, oltaim graun i save bruk hariap. Stori bilong dispela eria i soim olsem oltaim ren i save strong tru long dispela eria we Mocoa taun i stap. Wara na graun malumalum i spit tru i kam daun hariap tru long maunten na planti pipel i kirap nogut na i no gat taim long ranawe.

Ol pipel ranawe nabaut

Ol poto ol i kisim long helikopta i soim ol sampela ruf bilong haus, ol rot na bris i stap aninit long graun malumalum. Ripot i tok i no gat klinpela wara bilong dring na pawa long Mocoa na haus sik i pas.

Mausman bilong Kolombia Red Cross i tok 300 famili i no gat haus na planti haus tru i bin bagarap. Em i tok ol i no inap long helpim ol pipel long taim tait na graun malumalum i karim ol i go bikos i no gat rot long helpim ol.

FOAPELA pipel i lus na ol i ting ol i dai long bikpela tait wara em Saiklon Debbie i bin kamapim long Kwinslan.

Kwinslan Stet Disasta kodineta deputi komisina Stephen Gollschewski i tok ol i wok long painim yet ol dispela lain long saut is kona bilong stet.

Tupela meri i bin dai long tait wara long hap bilong noten Nu Saut Wels.

“I gat foapela pipel i lus yet na mipela i wari tru long ol na imejensi sevis bilong mipela i wok long painim ol yet,” Gollschewski i tok.

Wanpela bilong ol lain i lus em David Heidemann, 50, husat i no bin kamap long bungim ol pren bilong em bihain long em i lusim haus bilong em long Mondure klostu long Murgon, long not-wes Brisbane long las wik Fonde nait.

Campbells Road, we em i bin pasim tok long bungim ol pren i bin gat bikpela tait long dispela taim.

Ol i wok long painim tu narapela man Nelson Raebel bilong Eagleby, em ol i bin lukim em long Eagleby Road long Logan, saut long Brisbane, long Fraide apinun. Em i gat 77 krismas.

Namba tri man husat i lus yet i gat 60 krismas. Em i bin go wokabaut long bus las wik Trinde, long Lamington National Park.

Graun i bruk i go daun pasim ples tu na givim

bikpela hatwok tru long ol polis. Ol i kisim ol liklik trakta i kam rausim graun na bihain ol polis i wokabaut i go painim dispela man.

Ol polis i no tokaut yet long nem bilong namba foa man husat i lus yet.

Logan Riva i solap i go antap inap long mak bilong 10 mita long Waterford, Logan bihain long 1 klok apinun long Sarere. Ol i bin lukim kain tait olsem 43 yia i go pinis.

Dispela tait i no bin winim mak bilong 1974, meya bilong Logan Luke Smith i tok dispela eria i lukim mak bilong tait wara i surik i go antap tru.

Moa long 300 propeti, na ol 211 haus long Logan em wara i karamapim ol. Narapela 100 haus em Albert Riva i karamapim ol.

Eagleby na Beenleigh – we Albert na Logan Riva i bung – em ol eria we tait wara i save bagarapim ples olsem na gavman i bin tokim ol pipel long lusim dispela eria long las wik Fraide.

Long ol narapela hap bilong siti, ol pipel i mekim bikpela wok tru long klinim ples na rausim ol samting dispela bikpela tait i bin bagarapim long Fraide.

Moa long 22,000 haus i no gat pawa long saut-is Kwinslan tupela de bihain long Saiklon Debbie i bin hamaim dispela eria na pun-daunim 700 pawa lain.

Ol ripot nau i tok tait wara long noten Nu Saut Wels i wok long slek nau tasol ol pipel bai mekim bikpela wok tru long klinim ples na rausim ol samting dispela tait i bin bagarapim.

NSW Stet Imejensi Sevis (SES) komisina Mark Smethurst i tok i gat planti wok moa long mekim long hap bilong Lismore.

Ol lain SES i bin mekim bikpela wok tru long las wik Fonde long taim wara i wok long solap i go antap na karamapim ol haus. Planti bilong ol pipel ol i helpim i bin painim rot long ranawe long taim wara i wok long surik i go antap long haus bilong ol.

“Planti bilong ol i bin harim tok save long lusim haus bilong ol tasol ol i no bin harim tok. Dispela i bin wanpela bikpela hevi tru,” em i tok.

Lismore na Murwillumbah em tupela bikpela taun tait wara i bin bagarapim bihain long saiklon Debbie, i bin hamaim nambis bilong not Kwinslan wan wik bipo long ol riva i solap na kapsait.

Ol i bin helpim tu long rausim ol pipel long wanpela Aborijini komyuniti long Cabbage Tree Island.

I bin gat wari tu olsem Ballina na Woodburn taun i stap daunbilo long, Lismore bai kisim taim bihain long ol tait wara i go daun olsem long nambis.

Ol poto i soim graun malmalum i bagarapim Kolombia

Bikpela ren tru i bin hamaim sut-is hap bilong

kantri Kolombia long Mas 31. Dispela i kamapim bikpela graun bruk na graun malmalum i kilim ol pipel long Putimayo provins.



Wanpela paia paita i painim ol pipel insait long haus long Mocoa.



Long Epril 2, ol polis na ami i wok long painim ol pipel i stap.

Kiunga meri grup kisim helpim long faundesen



Ol meri Midel Flai i amamasim lonsim bilong skim i kamap long ples bilong ol. Foto: OKDF

WANPELA kredit skim i givim sans long Midel Flai, Westen Provins meri long go insait long wok bisnis.

Dispela skim em ol i opim long Kaviananga ples long 18 Mas wantaim helpim bilong Nesanel Developmen Benk (NDB) husat wok wantaim Ok Tedi Developmen Faundesen.

Dispela skim i tingting bilong Midel Flai Rijinel Wimen's Asosiesen we i pas wantaim Ok Tedi Developmen Faundesen (OKDF) we NDB i menesim dispela skim.

Asosiesen yet i kamapim K500,000 olsem sekyuriti bilong skim.

Aninit long Memorandum ov Agrimen, dispela mani ol bai givim wantaim helpim bilong NDB long Kiunga brens na olsem "dispela em ol meri long Midel Flai bai isi long kisim lon long go insait long wok bisnis."

Inap olsem 3400 manmeri i stap long lukim dispela opim bilong 18 ples i stap long Midel Flai.

Wanpela dami sek em ol i givim long OTDF Sif Eksekutiv Opisa Ian Middleton na MFRWA presiden Charlotte Mathews wantaim NDB Kredit Skim Menesa Daniel Wohwiehembe.

"Mipela i laik lukim yupela i develop long mak yupela i stap long em i go long narapela mak. Sapos kisim liklik lon, mipela i laik lukim yu kambek long narapela yia o tupela yia bihain na kisim bikpela lon moa," Wohwiehembe i tok.

"Taim yu mekim olsem dispela i soim yu wok long kamap gut na kamap bikpela."

Miss Mathews i tenk yu long OKTDF long gutpela menesmen, trensparensi na gaidens long olgeta CMCA meri, moa long hap bilong Midel Flai.

"Mi tok tenk yu long Trasti na ol man husat i sapotim mipela. Mipela i save ol man i sapotim mipela long mekim ol samting i kamap, long developim Midel Flai i go moa," em i tok.

OTDF CEO Mista Middleton i tok em i bikpela samting long lukim lonsing bilong kredit skim.

Em i tok wantaim helpim bilong OTDF na hatwok bilong ol manmeri dispela Livelihood Developmen Program i kamap long mekim skim i wok.

Em it ok ol meri na ol mama i gat laik long lukautim famili na man mas amamas long sapot long ol.

Em i tok sapos ol meri i wok ol man i mas givim sapot long ol long sait bilong givim mani na kamapim ol samting.

Mis Mathews na NDB menesing dairekta Moses Liu i sainim long Novemba long las mun we Mista Middleton na Mista Wohwiehembe i witesim long Kiunga.

Tripela meri asosiesen long Not Flai - Nima Ara Wimen's Asosiesen, Nupmo Wimen's Asosiesen na Tutuwe Ara Asosiesen, i tingting long kamapim wankain MoA long dispela yia.

Lokal kontrakta kampani sponsaim sumatin

WANPELA lokal kontrakta long Westen provins i sponsaim tupela sumatin long go moa na skruim skul bilong ol.

Wokman Teleoks, wanpela 100 pesen lokal kampani long Telefomin we i wok wantaim Ok Tedi Maining Limited (OTML) na i save ranim haia ka na konsaltensi sevis i mekim dispela helpim.

Kampani long namba wantaim i givim ful sponsasip we dispela i kisim tuisen fi, buk alowen bilong K1000 na wan mun K200 poket mani

na riten balus tiket.

Bod siaman Michael Trintemnok i tok skolasip i pailot projek bilong menesmen bilong Wokman Teleoks i kisim long helpim ol lokal sumatin husat i mekim gut na i gat laik long skruim skul bilong ol.

"Pailot projek skolasip em ol i givim long awotim ol greduet bilong Telefomin Sekedari Skul we ol i meki namba wan Gred 12 greduesen bilong ol long las," Trintemnok i tok.

Tupela 20-yia sumatin, Jepson Atpot bilong Oksapmin na Elizah Trintemnok bilong Telefomin i kisim dispela skolasip. Atpot i mekim Saiens Faundesen long Yunivesiti bilong Papua Niugini na Trintemnok i go long James Cook Yunivesiti long Townsville, Australia long mekim digri long Bisnis Stadi.

Dairekta Mathew Fukengim i tok menesmen bilong Wokman Teleoks i amamas long OTML long givim sans long ol long mekim wok bisnis.



Elizah Trintemnok (lep han) na Jepson Atpot i kisim skolasip long Benny Atbob, Wokman Teleoks asisten kantri menesa na Mathew Fukengim, kampani dairekta. Lukluk i stap em bod siaman Michael Trintemnok na ol wokman. Foto: Teleoks

Saina kampani opim haus kaikai long Tabubil

WANPELA restraun i op long Tabubil long las wiken long givim gutpela sevis long ol manmeri.

Dispela bai givim sans long ol wok manmeri bilong OTML, ol kontrakta, bisnis haus, gavman opisa na ol lokal lenona long traime nupela kain

kaikai. Gazebo Klab presiden Akolo Kotange i tok tenk yu long ol manmeri husat i kamap long opim bilong dispela restraun.

Em i askim ol tu long ol tok bek bilong ol i go long em long toksave sapos kaikai ol i kukim i

stret o no gat. "As tingting bilong mipela long sanapim Saina haus kaikai long Tabubil em long bringim nupela teis bilong kaikai long ol manmeri," Kontange i tok.

"Maski mipela i stap long bus ples, longwe

long ol rot, ol manmeri long Tabubil i ken kisim gutpela kaikai na amamas long ol arapela sevis wantaim.

"Mipela i laik lukim ol manmeri i amamas taim ol i stap long Tabubil.

"Mipela i hop olgeta manmeri lng taun i amamas long nupela kaikai na bihainim laik bilong ol long we ol i laik kaikai."

Em i tok tenkyu tu long Niugini Pride Menesmen long givim taim na kamapim ol wok long sanapim restraun. Dispela ol wok em ol i kamapim long mani bilong ol yet.



OTML Humen Risoses Menesa Harold Duigu (rait han) na bod dairekta bilong Tabubil Tredas John Wanim (namba tri long rait) em sampela ol bik man husat i kamap long witesim opim bilong Saina restrain. Foto: Gazebo Klab

Patel: Kumul Telikom bung bai kamapim liklik sas

BIKPELA senis bai kamap long ol kampani bilong gavman we long namba wan taim Kumul na Telikom bai stap aninit long wanpela bod.

Siaman bilong nupela Kumul Telikom, Mahesh Patel i tok dispela em i gutpela disisen.

Em i tok dispela bai lukim ol i sas bilong mekim bisnis wantaim dispela kampani bai liklik.

PNG Nesanel Eksekutiv Kaunsil i no longtaim i go pinis i tok orait long bung bilong dispela gavman telekomunikesen kampani, bmobile Vodafone (mobail) na PNG DataCo (infrastraksa) i go aninit long Telikom PNG, we ol bai kolim nupela nem Kumul Telikom.

Kumul Telikom, we i papa bilong IT sevises bilong DatecPNG and TV network EMTV bai stap olsem kampani bilong gavman na i stap aninit long Kumul Konsolidated Holding.

"Dispela bung wantaim i mekim sas bilong sevis i go daun na givim nupela tingting long mekim wok

bisnis. Dispela i givim sans long mipela i luksave long kos mipela bai gat long mekim wok bisnis na long bungim wok bilong olgeta telekomunikesen kampani," Ekt- ing Pablik Entapraisas Minista Charles Abel i bin mekim dispela tok pastaim long Februari.

Wantaim dispela i gat hop olsem dispela bung bai mekim kampani i givim gutpela sevis na long wankain taim i daunim sas bilong sevis bilong em taim em i wok resis egensim Digicel PNG.

Patel i tok bai gat ritel han bilong kampani we bai makim sas bilong ol sevis ol i givim long em.

"Wanpela as tingting long kamapim dispela wanpela kampani em long lukim ol kastoma i kisim sevis long olgeta sevis em i laikim em long wanpela hap tasol," Patel i tok.

Tasol em i tok PNG Indipenden Konsuma na Kompetisen Komisen bai rivium dispela bung we em bai rispektim tingting bilong ol.

NARI saveman mekim wok painimaut bilong sik bilong galip

James G. Kila i raitim

OL SAVEMAN bilong Nesanel Egrikalsa Risets Institiut (NARI) long Lae bai go long Madang provins long pinis bilong dispela wik long mekim wok painimaut long wanpela kain sik nogut we i wok long kilim indai ol galip diwai long PNG. Ol dispela saveman o saintis bilong NARI bai mekim dispela wok

bihain long sampela ripot i kamap olsem ol bikpela galip diwai long sampela provins long PNG i drai nating na indai.

Deputy Agrikalsa na Laipstok (DAL) long Madang provinsal edministresin, Godfried Savi i tok olsem dispela ol lain saveman bilong NARI bai mekim wok painimaut stat long Raikos i go inap long Bogia.

Mista Savi i tok ol bai stat wok ol

long Erima long Astrolabe Be LLG long Raikos distrik na go olsem long Boroi long Bogia distrik.

Dispela wok bai karamapim Sumkar eria we ol pipel i save laikim tru long kaikai galip na mekim kain kain spesel kaikai wantaim galip nat. Long Karkar ailan long Sumkar distrik galip em wanpela spesel nat bilong ol pipel we ol i save wokim kain kain stail

kaikai wantaim gris bilong galip.

Ol pipel bilong Karkar ailan save yusim ol diwai bilong galip long kisim timba long wokim haus bilong ol bikos timba bilong galip em strongpela tru na save stap longpela taim na no save bagarap.

Mista Savi i tok ol pipel long Madang provins husat i lukim wanpela galip diwai i drai nating i mas givim ripot i go long wanem gav-

man wokman i stap klostu long ol na ol dispela lain i ken go long DAL opis long Madang na putim ripot kwiktaim.

Em i tok NARI i gat wari olsem galip em wanpela nupela industri we i ken helpim ol smolholda fama long ples na haus lain na kain sik no gut i kamap bai givim hevi long fama. Em inap daunim tu dispela nupela galip industri long PNG.

Birua i kisim tupela laip



Ol wantok bilong ol lain i painim hevi i krai long ol. Foto: Lorraine Basse

Lorraine Basse i raitim

WANPELA yangpela papa bilong tripela pikinini wantaim wanpela bebi i dai na ol narapela 7-pela manmeri i kisim bikpela bagarap bihain long wanpela bikpela kar i bamim ol long Goroka long

dispela wik.

Birua i kamap long 8 klok long nait hapsait tasol long Haven Resort long Okuk haiwe.

Lofty, wanpela man i save salim buai, i tok draiva i lusim kontrol bilong kar sampela mita i go antap au-

sait long rot tasol draive i kalap kam ausait long kar bipo kar i go bamim wanpela 25-sita bas, tupela haus na stop long fran bilong wanpela stoa.

“Mi wok long pilai kas insait long haus wantaim ol liklik pikinini taim mi harim

bikpela nois. Mi ran i go ausait long haus na lukim wanem samting i kamap. Olsem na mi i go helpim ol.”

Lofty i tok laki na bikpela ren i pundaun. No gat em planti man tru bai i kisim bagarap bikos dispela hap em olgeta taim i save pulap

long ol manmeri.

Max Sinaluke i save slip klostu long birua i kamap i tokaut olsem ol i karim dispela bebi i dai i go long funeral home.

“Bebi husat i slip insait long haus, i dai long hap rot taim ol i wok long karim em

i go long hausik. Na narapela yangpela papa i sevim tripela pikinini bilong em wantaim wanpela bebi na em yet i dai.”

Max i tok moa olsem Goroka Hausik bai stil tokaut long ol narapela husat i kisim bagarap.

Mani birua kisim Ramu NiCo tasol prodaksen i orait

RAMU Nikel/Kobalt projek insait long Madang provins i bungim bikpela mani birua moa long K100 milien long las yia tasol projek i kamapim pinis olgeta mak bilong projek disain bilong em.

Kampani i lusim planti milien kina long taim bilong wol komoditi prais i pundaun we i daunim prais bilong nikel/kobalt na tu

long bikpela birua we i bin kamap long Basamuk las yia Epril taim wanpela man China i bin dai na projek i pasim wok.

Vais Presiden bilong Ramu NiCo, Zhao Deqian i bin tokaut long KBK elda bung bilong mun Mas, long KBK long Sarere Epril 1.

Eksekutiv Deputy Jenerel Menesa KBK Mine, Li Benta na Deputy Jenerel

Menesa Komesel KBK Mine, Liu Tianhua i bin stap wantaim Mista Zhao long dispel miting.

“Mipela i kamap long mak bilong prodaksen 109 pesen bihainim disain mak tasol nikel prais em daunbilo tru long US\$13,000/ton na hevi long Basamuk Epril 2016 kostim mipela milien kina mani birua nau,” em i tok.

“Mipela nau i gat bikpela

mani birua tasol liklik mani mipela mekim em i nap long wok operesin, pei bilong ol woklain na ol sampela wok ananit long MOA i go inap mipela i gat gutpela rekot mani bihain,”

“Mipela nau putim moa luksave long sefti na kontrolim ol standet bilong sefti long abrusim wankain birua we i bin kamap long Basamuk long Epril 2016.

Mipela les long bungim wankain birua we bai kostim kampani bikpela mani gen,” Mista Zhao i tok

Em i tok kampani i lusave long sampela hap ol eria we bai katim daun kost olsem daunim namba bilong ol China woklain na apim ol lokal wankain ananit long lokolaisesen program.

“Luksave bilong mipela nau em long mekim profit,

givim benefit i go long ol papagraun na stekholda na luksave olsem sefti stended bilong projek i antap tumas,” Mista Zhao i toktok

Mista Zhao i tok tenkyu tu long ol papagraun long ol sapot bilong ol long ol taim birua na askim ol long sapotim projek inap taim we kampani i mekim planti win mani na ol i ken kisim planti benefit.



KBK Mine elda wantaim KBK Main menesmen i bung long Mas projek updet miting long KBK Main opis



KBK Mine Regista Menesa, Sarimu Kanu i bungim ol woklain long hydro-mine long luksave olsem sefti em ol i bihainim stret.

2017 NRL Dro bilong raun namba 6

Det	Hom	Awe	Pilai Graun	TV	Taim
Fonde, Epril 6			Suncorp Stediam	Nine, Fox	7:50 pm
Fraide, Epril 7			McDonald Jones Stediam	Fox	6:00 pm
Fraide, Epril 7			Pepper Stediam	Nine, Fox	7:50 pm
Sarere, Epril 8			Brookvale Oval	Fox	3:00 pm
Sarere, Epril 8			CBus Super Stediam	Fox	5:30 pm
Sarere, Epril 8			1300Smiles Stediam	Fox	7:30 pm
Sande, Epril 9			Mt Smart Stediam	Fox	2:00 pm
Sande, Epril 9			AAMI Pak	Nine, Fox	4:00 pm

2017 NRL Lata | TELSTRA PREMIASIP

Po-sisen	Tim	P	W	L	D	B	F	A	+/-	Pts
1		5	5	0	0	0	102	48	54	10
2		5	4	1	0	0	128	72	56	8
3		5	4	1	0	0	106	78	28	8
4		5	4	1	0	0	101	98	3	8
5		5	3	2	0	0	114	78	36	6
6		5	3	2	0	0	109	82	27	6
7		5	2	3	0	0	120	99	21	4
8		5	2	3	0	0	104	86	18	4
9		5	2	3	0	0	78	75	3	4
10		5	2	3	0	0	92	104	-12	4
11		5	2	3	0	0	92	110	-18	4
12		5	2	3	0	0	64	95	-31	4
13		5	2	3	0	0	88	120	-32	4
14		5	1	4	0	0	118	140	-22	2
15		5	1	4	0	0	92	135	-43	2
16		5	1	4	0	0	62	150	-88	2

Titans i kisim planti bagarap

GOLD Coast Titans i kisim planti bagarap long raun namba faiv bilong 2017 premiasip salens long las wik Sande.

Titans i lus, 28-22, egensim ol Warriors long Oklan, Nu Silan, we tripela pilaia i no pinisim pilai bilong ol bikos ol i kisim bagarap.

Ol pilaia i kisim bagarap em Tyrone Roberts, Joe Greenwood na Nathaniel Peteru.

Tripela pilaia i joinim ol bipo skwat bilong Titans i bin kisim bagarap na bai malolo long raun namba 6 taim ol bai salensim ol Roosters.



Ol pilaia bilong Titans husat i kisim bagarap.

Dugan i kisim bagarap taim Dragons i daunim Tigers

DRAGONS i daunim ol Wests Tigers, 28-6, long Aianz pilai graun, tasol namba wan pilaia bilong ol, Josh Dugan, i kisim bagarap.

Dugan i painim hat long wokabaut long 60 minit bilong resis taim bihain long em i bin kisim bagarap long lek bilong em. Kurt Mann i kisim ples bilong em na i pilai i go inap long pinis bilong resis.

St George Illawarra Drag-

ons i kisim 28 poin we Nightingale i putim 3-pela trai, Lafai i putim wanpela trai, Macdonald i putim wanpela trai, Widdop i putim tripela konvesen na Ah Mau i putim wanpela konvesen kik i go insat.

Naiqama i putim wanpela trai na Moses i kikim konvesen i go insait long kisim 6 poin bilong ol Wests Tigers long ANZ Stediam.



Josh Dugan i kisim bagarap na ol i karim em i go aut long pilai graun.

Nightingale i putim 3-pela trai



WINGA bilong St George Illawarra, Jason Nightingale, i tok olsem em i putim tripela trai bilong ol Illawarra bikos skipa bilong ol, Gareth Widdop, i soim kala bilong em na salim bal long Jason long putim ol trai.

Stail bilong Widdop i lukim ol St George i daunim ol Wests Tigers, 28-6, na ol Dragons i stap namba tu ples long lata.

Winga bilong ol Dragons, Jason Nightingale, i ran long putim tripela trai long namba wan hap bilong resis egensim ol Tigers.

Mairis Briedis i wina bilong WBC krusaweit pait

MAIRIS Briedis bilong Latvia i daunim Marco Huck isi long kisim WBC krusaweit taitel na liklik IBO belt bilong ol Jeman long las wik Sande.

Ol jas i skorim 116-111, 117-110, 118-109, long tripela raun we Briedis i winim long olgeta raun.

WBC taitel i stap fri taim ol i bin tokaut olsem Tony Bellew i sempion na bihain em i painim hat long strongim taitel bikos em i brukim han bilong em.

Bellew brukim han bilong em taim em i win long hevi-

weit resis egensim David Haye long Mas 4, tasol em bai pait gen long winim taitel taim han bilong em i orait.



Mairis Briedis bilong Latvia i daunim Marco Huck na winim WBC krusaweit taitel.

Rot i go long Frans i stat

OL tim long Esia i statim wokabaut bilong ol long go long 2019 FIFA Wol Kap resis bilong ol meri bai kamap long Frans.

Ol i stat pilai long kisim ples long FIFA resis we ol i bin mekim 4-pela grup.

Ol tim bai resis long ol grup long kamap kwalifai em;

Grup A: Jordan, Philippines, Bahrain, Iraq, United Arab Emirates na Tajikistan,

Grup B: Korea Ripublic, Uzbekistan, Hong Kong, India na Korea DPR

Grup C: Thailand, Chinese, Taipei na Palestine

Grup D: Vietnam, Myanmar, Iran, Syria na Singapore.



Piksa i makim olsem ol meri i redi long go long Frans.



Ramu Projek Papagraun stap long PV trening



Ol lain papa na mama graun bilong Ramu Projek i sanap long grup poto wantaim Papa Sam (namel long fron) na Vais Presiden bilong Ramu NiCo (MCC) Wang Baowen.

OL SAMPELA lain grup papa na mama graun insait long Ramu NiCo Projek i bin stap harim ol gutpela toktok na salens insait long wanpela pesonal vaiabiliti trening em Human Developmen Institiut i bin kamapim long Mas 13 i go 15.

Dispela tupela de woksop em Ramu NiCo Menesmen (MCC) aninit long Komyuniti Afes Dipatmen bilong en i bin ogenaisim na bringim wanpela biknem man olsem Samuel Tam Sur em planti save kolim em "Papa Sam" long ranim trening.

Dispela tupela de trening em CA Dipatmen bilong Ramu NiCo i kamapim long givim gutpela trening long ol ol papagraun long projek eria long sait long menesmen save na skils long ranim o lukautim ol spin-ov bisnis bilong ol.

Planti ol lain papa na mama graun husat i bin stap insait long dispela PV trening i amamas tru bikos planti ol toktok na salens em Papa Sam i givim i gutpela tru.

Ol lain husat i bin stap long dispela PV trening i bin kam olsem long Kurumbukari, Inlen Paipain (Maigari), Kostal Paipain na Basamuk.

Papa Sam i givim isi edvais na giv planti gutpela tingting long helpim wan wan man o meri developim em yet wantaim gutpela pasin na lukluk moa long sait long helpim

em yet long wok bisnis long daunim pasin bilong stap rabis na helpim long divelopim gutpela sindaun na laipstail.

Papa Sam i givim strongpela toktok taim em i tok olsem PNG em kantri we God i blesim wantaim planti samting tru, tasol bikpela hevi nau em ol pipel long PNG i no gat gutpela tingting long sanap strong na divelopim sindaun na laipstail bilong ol yet. Dispela i mekim na kantri i stap daun-bilo tru olsem diveloping kantri long poveti lain.

"Papa God i blesim Papua Niugini wantaim planti risoses. Planti ol foren lain o ovasis lain i kam na kisim ol risoses na mekim wok na kamapim bisnis bilong ol yet i stap ris, na ol pipel bilong PNG i stap wankain yet olsem bipo," Papa Sam i tok.

Em i tokaut tu olsem long wol tude, PNG em wanpela narakain kantri we ol papagraun i bos bilong graun. Tasol sori tru olsem ol asples lain i stap rabis yet na planti i no gat gutpela edukesen long kirapim wok bisnis na helpim sindaun bilong ol wantaim komyuniti bilong ol.

Papa Sam i tokaut tu olsem tude olgeta ol bikpela bisnis olsem ol supamakot, hotel na ol riteil stua em ol ovasis lain i papa long en.

Em i tokaut olsem bikos long nogat inap edukesen o

save long ranim bisnis, planti ol lokal lain long PNG i save yusim mani nating nating na ol no save sevim mani long kirapim bisnis o yusim long gutpela rot.

"Planti taim bai yu lukim ol lokal lain i go insait long ol bikpela stua wantaim bikpela ol troli o basket long baim kaikai na yusim bikpela mani bilong ol. Ol nogat ol arapela sevings na wanem mani ol i kisim long salari o pei bilong ol em ol save yusim long go long ol supamakot na baim kaikai long stua bilong ol aut-sait lain," Papa Sam i tok.

Em i tokaut olsem bikpela as tru kain pasin i wok long kamap long PNG em nogut gutpela edukesen i stap long sait long human developmen. Ol manmeri nogat

save long wanem rot i ken mekim ol i luksave long helpim na groim ol yet long wok bilong bisnis.

"Taim ol autsait o ovasis lain i kam wokim bisnis long kantri bilong yu, em bai isi tru long ol long kontrolim rot bilong mani na tu brukim ol lo na regulesen long helpim ol yet na bisnis bilong ol," Papa Sam i tok.

"Nau yet dispela pasin i wok long go bikpela tru long PNG," Papa Sam i tok olsem taim ol manmeri i stretim tingting bilong ol na em stap stret, bai nogat paol pasin o mis-menesmen bai kamap long wok bilong ronim bisnis.

Em i tokaut olsem Human Developmen Institiut em i kamapim long skulim ol pipel long rot long menesim

gut mani na risoses bilong ol na yusim long gutpela rot.

"Sapos yu tingting tasol long stretim nek na bel bilong yu tude, sori tumas olsem dispela kantri PNG bai stap wankain na na ol arapela ausait lain bai tekova na kontrolim bisnis long hia," Papa Sam i tok.

Siaman bilong Kurumbukari Limited, Bonny Yombai i amamas long gutpela trening tru Papa Sam wantaim tupela trena bilong em i kamapim. Em i tok em namba wan kain trening na em i amamas stret long planti samting em i lainim we em olsem salens long ol.

Mista Yombai i tok olsem ol i nidim kain institusen olsem long kamap long Madang provins long helpim


ol long sait long bisnis bikos planti long ol i no gat gutpela edukesen na skul long pastaim.

Man i go pas long ogenaisim miting na Deputi Jeneral Menesa bilong Ramu NiCo (MCC) CA Dipatmen, Albert Tobe, i askim ol lenonas long mekim gutpela yus long trening long kamapim senis long laip bilong ol na tu long sait long kirapim na ronim bisnis.

Mista Tobe i tok olsem MCC i helpim long ogenaisim miting na askim Papa Sam wantaim HDI long givim trening na skul toktok. Wok nau i stap long ol lenonas long sanap strong na wokim bisnis long helpim sindaun bilong ol na pikinini na tumbuna long bihain taim.



Ol lain papa na mama graun bilong Ramu NiCo Projek i harim Papa Sam i givim toktok long pesonal vaiabiliti.



Eksektiv bilong PNGOC i kamap eksektiv bilong ONOC



Sekekeri Jeneral, Avita Rapilla, Presiden bilong PNGOC, Sir John Dawanincura na Mel Donald i kisim namba wan awod long ol i save promotim ol meri long spot.

SEKENIA Vais Presiden bilong Papua Niugini Olimpik Komiti (PNGOC), Mel Donald, i kamap Eksektiv Bod bilong Osenia Nesenel Olimpik Komiti (ONOC).

Ol i bin makim em long ONOC Jeneral Asembli long Nadi, Fiji, long las wik Sarere. Ol het lain husat i makim PNGOC long Jeneral Asembli em Presiden Sir John Dawan-

incura, Mel Donald na Sekekeri Jenerel, Avita Rapilla. Donald i joinim Rapilla long ONOC Eksektiv, husat em i Intenesenel Olimpik Komiti (IOC) memba.

Wisil i winim Australian nesenel sempionsip



Toea Wisil i daunim rekot holda bilong Australia, Ella Nelson.

NAMBA wan meri rana bilong Papua Niugini, Toea Wisil, i winim tupela resis long Australian nesenel sempionsip long Sydney, Australia. Resis i kamap long wiken we em i winim mak bilong 100 mita resis insait long

11.42 seken na 200 mita resis insait long 23.76 seken. Wisil i bin winim 200 mita resis long las wik Sande we em i bin daunim Olimpik semi fainal wina, Ella Nelson, bilong NSW. Wisil i save gut na i gat strongpela bilip long winim

100 mita resis tasol, em i kirap nogut bihain long em i winim 200 mita resis. Wisil i putim nupela rekot bilong PNG na em i gat bikpela amamas long winim 100 mita na 200 mita resis wantaim long bikpela resis bilong Australia.

PNGOC i kisim tupela awod



Presiden bilong PNGOC, Sir John Dawanincura, i kisim namba tu awod long ol i save sapotim OSEP.

PRESIDEN bilong Papua Niugini Olimpik Komiti (PNGOC), Sir John Dawanincura i kirap nogut long kisim tupela awod long Osenia Nesenel Olimpik Komiti (ONOC) Yia Jenerel Asembli long Fiji. Ol i givim tupela awod long PNGOC i save mekem wok gut insait long Osenia rijon.

Namba wan awod i kam long Intenesenel Olimpik Komiti (IOC) bilong ol i luksave long wok bilong PNGOC long promotim na developim spot bilong ol meri na gel long spot. Namba tu awod em ol i givim long PNGOC i save sapotim Osenia Spot Edukesen Program (OSEP).

United Sisters i winim bek taitel bilong ol

Philemon Tame i raitim

UNITED Sisters i winim bek taitel bilong ol bihain long ol i pait strong, 8-4, win egensim ol Bears long A gret divisen gren fainal bilong Pot Mosbi softball resis bilong ol meri long Bisini pilai graun long las wiken.

skruim mak bilong ol United Sisters long stap pas, 2-0, bihain long ol i pinisim namba wan ining. Dispela skoa i strongim ol United Sisters long kisim moa skoa we ol Bears i painim hat long strongim banis bilong ol. Long B gret gren fainal resis ol Yokomo i daunim ol Mariniers 6-4.



Ol United Sisters i amamas long ol i win.

Hela Provinsal Gavman i helpim ol Wigmen

Timon Henry i raitim

HELA Provinsal Gavaman i bin helpim K600, 000 wantaim Kumul Petroleum Holdings (KPH) long pilai ragbi olsem long Digicel kap resis. Gavana bilong Hela Provins, Hon Francis Potape, i tok Gavman putim mani mak olsem K1.2 milien wantaim KPH long pilai bilong ol Wigmen. Gavana i tok moa olsem mani i kam long K45 milien kina developmen levi we k600, 000 bai go long wanwan klap i redi long pilai. Em i tok tenkyu na ama-

mas long ol lain husat i Em i tok tenkyu tu long sapotim Tim Hela Wigmen Kwinlan Ragbi lig klap, Ipswich Jets, bihain long ol bai pilai long Digicel Kap. Potape i tok dispela kain Bod bilong Wigmen i salim wok bung i save Karim gutpela pas i go long kamapim wanpela ples bilong pilai



Gavana bilong Hela Provins, Francis Potape.

Vipers bai makim 30 man skwat

NCDC Port Moresby Vipers bai makim 30 man skwat bipo long pilai bai stat long Epril 16. Vipers i bin makim 38 pilaia we ol bai rausim 8-pela long dispela wiken bilong kamap wantaim fainal 25 pilaia na 5-pela developmen pilaia. Operesen Menesa bilong Vipers, Paul Komboi, i tok olsem ol i gat tupela wik long kamap wantaim namba

ol i laikim long en. Ol 38 man skwat ol i kamap wantaim em; Brendon Gotuno, Edene Gebbie, Michael Yanis, Junior Lo, Frank Tole, Nicko Dom, Rex Maima, Ben Wemin, Maxwell Doriga, Jonah Kautu Jnr, Dicksy Ani, Ate Bina, Supa George, Nixon Kolo, Raymond Tia, Samuel Koim, Ase Gima, Manu

Kame, Ham Tina, Nelson Wak, Chicko Mairi, Yoks Bagave, John Supa, Patrick Morea, Isaac Gende, Lawrence Kuso Jnr, Tom Moide, Stanley Korowa, Andrew Warako, Bob Gore, Vagi Agalu, Hekura Udu, Desmond Korpok, Chris Vani, Chris Enara Jnr, Makara Ura, Philemon Kimisive, na Sypro Thomas.

Hunters i stap namba 5 ples long lata



Ol pilaia bilong Hunters i laik takolim birua bilong ol.

SP HUNTERS i winim raun namba 5 resis na i stap namba tu ples long lata bilong 2017 Intras Supa Kap resis.

Bihain long namba wan lus long raun namba 4, Hunters i daunim ol Mackay Cutters, 36-16, long BB Print Stediam, Australia long las wiken.

Ol i stap namba tu ples wantaim 8 poin bihain long ol Norths Devils. Ol Devils i stap long namba wan ples wantaim 8 poin tu.

Raun namba 6 i lukim ol Hunters bai pilai egensim ol namba 4 ples, Sunshine Coast Falcons long Sarere long Sunshine Coast Stediam, Australia. Pilai bai stat long 4.35 apinun.

Kosa, Michael Marum, i tok Lawrence Tu'u bai kisim ples bilong Ismael Balkawa long raun namba 6 resis.

"Ismael bai no inap pilai long resis bai kamap long dispela wiken na mipela i tok orait long Lawrence long kisim ples bilong em bihain



Kosa bilong SP Hunters, Michael Marum.

long ol i rausim em long las minit bilong las wiken resis," Marum i tok.

"Dispela em i 17 man skwat mipela bai go wantaim."

Long wankain taim, kepten bilong ol Hunters, Ase Boas bai pilai namba 50 gem bilong em long dispela wiken.

Ol 20 man skwat we ol bai rausim tupela em; 1)Bland

Abavu, 2) Stargroth Amean, 3) Israel Eliab, 4) Willie Minoga, 5) Karo Kauna Jr., 6) Ase Boas (captain), 7) Watson Boas, 8) Henry Wan, 9) Gahuna Silas, 10) Esau Siune, 11) Nixon Put, 12) Moses Meninga, 13) Stanton Albert, 14) Noel Joel, 15) Rhadley Brawa, 16) Enoch Maki, 17) Lawrence Tu'u, 18) Muka Peter Kulu, 19) David Loko, 20) Wawa Paul.

Ol i setim nupela rekot long swimming

THEODIST Nesenel Swimming Sempionsip i kamap long Pot Mosbi long las wiken i lukim olsem ol i setim 15 nupela rekot.

Presiden bilong PNG Swimming Inkopret, Liz Wells, i tok olsem ol swima i soim gut kala bilong ol we ol i winim mak long taim na setim nupela rekot bilong ol yet.

Ol i setim 9-pela PNG Eij rekot na 6-pela PNG Mastas rekot long Taurama Akwatik na Leisure Senta.

Ol swima husat i setim nupela rekot em Savanah Tkatchenko, Ebony Tkatchenko, Shanice Paraka, Ryan Maskelyn, Tamara Green na Kevin Debruyen.

Savanah i setim 4-pela rekot na sista bilong em, Ebony i brukim tupela rekot we Savanah i holim bipo.

Ol narapela swima i winim wan wan rekot, tasol Green i putim tripela nupela Masta Rekot.



Ol swima i redi long daiv i go insait long pul.

PNGNRL resis bai stat long dispela mun



PNG NRL Siaman, Adrian Chow, i stap namba tu long han kais wantaim ol hetman bilong PNGRFL.

NESENEL Ragbi Lig 2017 sisen long PNG bai stat long 22 Epril inap long 23 Epril.

Nupela siaman bilong PNG NRL, Adrian Chow, i tok

olsem ol bai salim aplikesen i go long ol tim husat bai resis.

Ol bai pinisim dispela aplikesen long Fraide na bihain, ol eksektiv bod bai sainim

agrimen fom wantaim ol aplikesen husat i winim mak.

"Ol bai tokaut long dispela sisen long Epril 19," Chow i tok.

PNG Pawa i pawa tumas

Nicky Bernard i raitim

PNG Pawa i daunim ol Brown Eagles long sofbal semi fainal bilong ol man long NCD long las wik Sande na baiol i bungim ol Yokomo long gren fainal long dispela Sande.

Brown Eagles i go pas long skoa long tupela inings na holim strong dispela skoa inap long namba tri inings taim ol kam na skoa narapela tupela ran long bringim skoa i go long 4-0.

PNG Pawa i no tanim pawa bilong ol on na i no bin skoa long foapela inings olgeta we i soim olsem Eagles i strong tru long pilai na stopim Pawa mangi long go long namba wan bes.

Brown Eagles i slek liklik

long namba 5 na 6 inings we i lukim PNG Pawa i putim on pawa bilong ol na kam level wantaim skoa long 4-4 long namba 6 inings.

PNG Pawa i mekim las beting bilong long namba 7 inings na bringim wanpela ran long bringim skoa i go long 5 na Eagles 4. Brown Eagles i gat las beting bilong ol tasol ol Pawa mangi i putim gut was long olgeta kona bilong pilai graun. Pitsa bilong PNG Pawa tu i strongim em long tromoi gut bal long autim ol beta bilong Eagles taim ol i kam bet.

PNG Pawa i onim pawa bilong ol inap ol i autim olgeta beta bilong Brown Eagles long kisim ol go long Gren Fainal long bungim Yokomo.

Skoa bilong long namba 7 inings PNG Pawa 5 Brown Eagles 4.

PNG Pawa nau bai go bungim Yokomo long dispela Sande long gren fainal pilai bilong ol man long Bisini Sofbal graun.

Yokomo i bin winim PNG Pawa long bukum namba wan ples long gren fainal taim PNG Pawa kam daun na bungim Brown Eagles na winim ol long las wiken.

Dispela wiken tu bai ol tokaut long ol man tim bilong karim nem bilong Mosbi long go pilai long Nesenel Sempionsip long Kokopo long Ista wiken. Mosbi yet bai gat tupela tim bilong ol man long go pilai long Kokopo.

Kos bilong FINA i pinis gut

KOS bilong ol teknikal opisal bilong FINA i kamap long Taurama Akwatik Senta long Mas 29 inap Epril 2 i kamap gut long mak.

I gat 24 manmeri i stap insait long dispela kos i lainim

ol samting long makim taim long pawa, long makim taim long han was na sampela samting moa.

Prektikal hap bilong kos i bin kamap long taim bilong Theodist Nesenel Semp-

onsip long las wiken.

Presiden bilong Papua Niugini Swimming Inc, Liz Wells, i tok olsem ol lain i stap insait long dispela kos bai save gut long ol lo bilong FINA na bai lukautim gut ol resis bai kamap.

Tas Futi resis bai kamap long Jun

TAS Futi Nesenel Sempionsip bai kamap long Jun 9 inap 11 long Pot Mossbi. Wok redi i go hat bilong resis bai kamap long Bisini pilai graun.

Tas Futbol Papua Niugini (TFPNG) i lukluk long makim 30 pilaia bihain long sempionsip bilong redi long go resis long 2019 Wol Kap

bai kamap long Kuala Lumpur, Malaysia.

Presiden bilong TFPNG, Dadi Toka Jr, i tok olsem sempionsip bai kamap long dispela yia em i bikipela samting bilong makim 60 man na meri skwat bilong Tim PNG.

Tim long Brisbane, Australia, bai kam resis tu long pilai bai kamap long Jun.

Lukim ol poto bilong fainal bilong Pot Mosbi Soka Asosiesen (PMSA) na Gren Fainal bilong ol meri Sofbal long Bisini. Planti bilong ol poto em ol kisim ol prais na tropi.



Tim Bears wantaim trofi bilong ol long kamap namba tu.



Tim Sisters wantaim tropi bilong ol bihain long ol winim Bears long sofbal gren fainal pilai bilong ol long Pot Mosbi.



Kepten bilong ol meri Guria i kisim tropi long han bilong presiden bilong PMSA.



Juliette Seri i kisim prais bilong em long han bilong bikmeri bilong MMI. MMI em i bikpela sponsa bilong Meri Sofbal long Pot Mosbi.



Straika bilong Mungkas i resis long bal taim pilaia bilong Yamaros i kam long bihain long stopim em long gren fainal pilai bilong ol long pri sisen resis.



Kepten bilong ol meri Mungkas i kisim tropi bilong ol long kamap namba wan long PMSA pri sisen resis.



Beta bilong Sisters i soim strong bilong em long paitim bal long gren fainal pilai bilong ol long Sarere long Pot Mosbi.



Beta bilong Bears i lukluk long paitim bal.



Kepten bilong Yamaros Soka Klap i kisim tropi bilong ol long kam namba tu.



Lasen Marape, bilong Dobo Warriors i ran wantaim bal taim pilaia bilong Royals i putim was long takolim em long Pot Mosbi Ragbi Lig resis long NFS. Ol poto: Nicky Bernard



Beta bilong PNG Pawa i redi long paitim bal long semi fainal sofbal resis bilong ol man long Mosbi. PNG Pawa i pawa tumas long kam bihain na winim Brown Eagles 4-5 long kisim ol go long gren fainal long Sande dispela wik.



Kepten bilong Mungkas tim 2 i kisim tropi bilong ol long kamap namba wan long pri sisen soka bilong PMSA.



WHITE TUNA FLAKES
DIANA White



WHITE TUNA
insait
K 2.20



Tasty and Flavourful White Tuna for Everyone!

Manufactured by:
RD Tuna Cannery Ltd.

Nicky Bernard i raitim

MUNGKAS soka tim bilong ol man na meri em i sempion bilong Pot Mosbi Soka Asosiesen pri sisen resis.

PMSA i kamapim pri sisen resis long stat bilong dispela yia long bungim ol tim bilong ol bihain long ol bin stopim soka resis long Pot Mosbi long sampela bikpela pilai i bin kamap long klostu tupela yia olgeta.

Dispela pri sisen soka resis bilong PMSA i kisim klostu long 10-pela wik olgeta na fainal pilai i kamap long las wiken Sarere we ol man Mungkas 2 i bin kisim Yamaros long gren fainal pilai.

Ol Mungkas i winim olgeta pilai long pul bilong ol na bihain ol i go insait long kwata na semi fainal na bihain kam wetim gren fainal.

Ol man Yamaros tu i winim olgeta gem long pul bilong ol na go insait long kwata na semi fainal na kam bungim Mungkas long gren fainal.

Tupela tim wantaim i pilai strong stret long namba wan hap we no gat gol i bin kamap. Bihain long namba tu hap Mungkas i kamapim sampela gutpela pilai long putim tupela straiika bilong ol long gutpela posisen long skoaim gol.

Tupela straiika bilong Mungkas i gat wan wan sans long skoaim gol

Mungkas i sempion bilong PMSA pri sisen



Tim Mungkas 2 wantaim sapota na tropi bilong ol bihain long gren fainal. Poto Nicky Bernard

long gol mak bilong Yamaros na bringim skoa bilong Mungkas i go 2-0 na kisim taitel bilong PMSA pri sisen bilong ol man.

Mungkas meri tu i bin winim taitel bilong ol meri long taim ol i daunim ol Guria 2-0 long kamap Kwin bilong PMSA pri sisen. Pilai bilong ol i bin kamap pastaim bipo long bikpela ren bin kamap long Mosbi siti na stopim planti gem. Dispela bikpela ren i bringim gren fainal pilai bilong ol man i kam long las wiken.

Pot Mosbi Soka Asosiesen bai kamapim seven asait soka resis long Bisini soka graun long Ista wiken. Dispela soka resis bai lukim ol tim bai pilai sevenpela pilaia tasol long ful pilai graun long lukim husat tim i gat longpela win na bai pilai stail soka long dispela 4-pela de resis.

Ol tim husat laik resis long seven asait mas redi na givim nem bilong tim bilong ol long ol bikman bilong PMSA bipo long Ista kamap.




PMV

DIESEL OIL

PMV OIL BILONG YUMI



PORT MORESBY	☎ 325 5255
LAE	☎ 472 1144
MT HAGEN	☎ 542 1933
TABUBIL	☎ 649 9048
KIMBE	☎ 983 5035
MADANG	☎ 422 2659
KOKOPO	☎ 982 8193
GOROKA	☎ 532 3552



Email: info@borokomotors.com.pg
 Website: www.borokomotors.com.pg